



史記志疑
附錄

(二)

梁玉繩撰

史記志疑卷四

秦本紀第五

玄鳥隕卵。女脩吞之。生子大業。

案。吞卵之妄。同于簡狄。說在殷紀中。

咨爾費。

案。費是國名。竹書。費侯伯益是。史誤以大費爲名。故不曰咨益。而曰咨費。舜果有斯語哉。秦。趙同祖。其所說神怪事。俱自博會以銜世。史公信而紀之。失之蕪矣。

乃妻之姚姓之玉女。

附案。玉女者。珍之也。禮記曰。請君之玉女。呂氏春秋貴直篇亦有身好玉女語。而徐廣引皇甫謐云。賜之元玉。妻以姚姓之女。殆妄說也。

實鳥俗氏。

附案。秦詩譜疏引此作鳥谷。通志氏族略云。鳥浴氏。又譌爲路洛氏。未知誰是。

大廉玄孫曰孟戲。中衍。鳥身人言。

案。索隱云。舊解以孟戲。中衍。是一人。今以孟。中。分字。當是二人名也。索隱是人表亦分作二人。人表戲作

作麴但鳥身上似脫中衍二字不然太戊妻之當何屬而下文所謂中湣者又誰之玄孫路史後紀七辨孟麴當夏中世

衍兄然鳥身之說似誕趙世家作中衍人面鳥喙

是時蜚廉爲紂石北方
附案集解徐廣曰皇甫謐云作石椁于北方索隱曰石下無字則不成文意亦無所見必是史記本脫
皇甫謐尙得其說徐雖引之而竟不云是脫何字專質之甚余攷水經注六述此事言飛廉先爲紂使
北方御覽五百五十一卷引史記亦曰時飛廉爲紂使北方使字甚確當因傳寫譌使爲石非字有脫
皇甫說不足據因下有石棺而妄言之徐廣引之以著異同元非以補史缺而亦不知其誤也至御覽
四十卷引史又言蜚廉先爲紂作石槨必兼采徐注以臆增改爾古史于石下加棺字亦非
賜爾石棺以華氏死遂葬于霍太山

案孟子言飛廉戮于海隅而此言天賜石棺以葬于霍太山妄也

得驥温驪驪駟耳之駟

附案穆王八駿史不全具蓋皆因其毛物以命名而趙世家云造父取驥之乘匹與桃林盜驪驪駟綠
耳較此紀又異也温字誤徐廣云一作盜是世家及穆天子傳列子穆王篇博物志竝作盜乃淺青色
馬索隱直以温音盜非鄒誕生本作駟亦非荀子性惡篇作織離

西巡狩樂而忘歸徐偃王作亂造父爲繆王御長驅歸周以救亂字周下一本有日行千里四以注觀之當有

案三墳補逸曰竹書穆王北征犬戎而徐夷侵洛造父御王歸定其亂乃復西征見西王母與史不同未詳孰是正義曰古史攷云偃王與楚文王同時去周穆王遠矣且王者行有周衛豈得救亂而獨長驅日行千里乎竝言此事非實年表穆王元年去楚文王元年三百一十八年余謂此事詳載後漢書東夷傳真偽莫攷誠如譙周所疑而以爲徐偃與楚文同時則仍韓子之誤也五蓋篇云徐偃王行仁義徐滅之三百十八年之數亦未確厲王已上年表無年不識守節從何案論據世表穆王時之楚子是熊勝楚文王淮南人間尤誤訓作莊

有子曰女防

附案秦詩譜疏引此作女妨人表同疑此譌寫

太凡生大駱

附案詩疏引此作大維人表同蓋古通用維亦馬名也

大駱生非子以造父之寵皆蒙趙城姓趙氏

案上文言造父封趙城族由此爲趙氏是也乃又謂非子蒙趙城則非趙索隱又謂始皇生于趙故姓趙尤非說本魏張晏蓋秦趙同祖後人或可互稱故陸賈傳曰秦任刑法不變卒滅趙氏漢書武五子傳曰趙氏無炊火焉左思魏都賦曰二嬴之所會聆三國志陳思王疏曰絕纓盜馬之臣赦楚趙以濟其難楚世家及越絕書外傳記地淮南子人閒秦族二訓稱始皇爲趙政南越傳稱蒼梧王趙光爲秦王文選王融策秀才文云訪

游禽于絕澗。作霸秦基。若以造父之趙。蒙非子之秦。未免礙理。說見紀末。其長者曰莊公。

附案。襄公始爲諸侯。襄公之先。不過大夫而已。稱莊公者。詩秦風譜疏云。蓋追諡之。理或然也。或曰。承非子之初封。僭稱爲公。猶非子之子稱秦侯耳。十二侯表。索隱本作莊公。以其爲名。非也。

以女弟繆嬴爲豐王妻。

附案。評林曰。周無豐王。閩本作幽王。蓋幽、豐字相近。而又適其時。作幽似矣。然幽王妻申后。何以有繆嬴。邪。方氏補正曰。不后而妻。蓋夫人嬪婦之類。時秦僻陋。故史以妻書耳。方氏雖據曲禮。天子有妻有妾爲解。然何以不言納女邪。海寧周孝廉廣業曰。豐王疑是戎王之號。荐居岐豐。因稱豐王。與亳王一例。非幽王也。上下文周厲王、周宣王、周幽王、周平王皆連周字。知此必非幽王。秦襄以女弟妻戎王。卽鄭武公妻胡之計耳。說甚愜。

戎圍犬丘世父。

案。世父二字衍。

乃用駢駒黃牛羝羊各三。祠上帝西時。

案。年表及封禪書各三。當作各一。上帝當作白帝。岐以東獻之周。

附案。鄭秦詩譜曰。橫有周西都宗周畿內八百里之地。孔疏曰。如鄭言是全得西畿。與本紀異。案終南山在岐之東南。大夫戒襄公。已引終南爲喻。則襄公亦得岐東。非惟自岐以西也。如本紀之言。秦之東境。終不過岐。而春秋之時。秦境東至于河。襄公已後。更無功德之君。復是何世得之。明襄公救周。卽得之矣。本紀不可信。余謂鄭譜固誤。孔疏尤誤。終南隔渭相望。詩人起興。不必定是得岐東。秦地至河。在晉惠公獻地後。乃穆公創霸時事。左傳及本紀甚明。不得言襄公後無功德之君。秦地卽至河也。至獻岐東之說。或者秦獻之而周不能有。遂仍入于秦乎。

是爲寧公。

附案。始皇紀末。秦記作憲公。人表同。卽案隱于秦記。引秦本紀亦作憲公。則寧字以形近致譌。此與年表竝當改爲憲公。徐廣謂寧一作曼。非。

遣兵伐蕩社。

附案。索隱曰。西戎之君號亳王。蓋成湯之胤。其邑曰蕩社。徐廣云。一作湯杜。言湯邑在杜縣之界也。余謂蕩卽湯。古字通用。西戎亳王號湯。社乃衍文。杜字亦非。水經注廿三卷。引此紀作湯。無社字。可證。湯在杜縣之界。後人以杜字注其下。混入本文。而又譌爲社耳。周本紀論杜中。徐廣云。一作社。亦譌杜爲社也。杜禪書。杜亳杜主祠。魏世家。惠王十六年。杜平。竝譌作社。

鄭高渠昧。

附案。眯卽彌字。史以眯爲彌。音相近。而彌又作彘。形相似耳。晉世家以提彌明爲示眯明。亦同。十三年。齊人管至父。連稱等殺其君襄公。

案。左傳。事在秦武公之十二年。

晉滅霍、魏、狄。

案。晉滅三國。在秦成公三年。此書于武公十三年。相隔二十四載。宋葉大慶攷古質疑糾之矣。以犧三百牢祠鄜時。

附案。封禪書索隱曰。百當爲白。秦君西祀。少昊。牲尙白。雖奢侈僭祭。郊本特性。不可用三百牢以祭天。蓋字誤耳。徐氏測議曰。吳子徵會百牢。秦人僭侈。旣用郊時。未必臻特性之禮。百字不爲誤也。二說徐是。此紀及封禪書。漢郊祀志固竝云三百牢。若改爲白。句法不順。

三年。鄭伯。虢叔。殺子頽。而入惠王。

案。此宣公四年事。

晉獻公滅虞。虢。虜虞君。與其大夫百里奚。以璧馬賂于虞。故也。旣虜百里奚。以爲秦繆公夫人媵于秦。

案。孟子言百里奚。知虞公之不可諫。而去之秦。知虞公之將亡。而先去之。安得有被執爲媵之事。被執爲媵者。虞大夫井伯也。史誤合爲一人。故于晉世家連書虜井伯。百里奚。而于此紀直以百里奚替井伯。路史後紀四注妄謂井伯奚邑于百里。然誤從韓子說難。呂子慎人篇來。或問。以井伯爲別一人。奚

據曰。人表百里奚在第三等。井伯在第六等。斯乃的證。況朱子已曾辨其非一人矣。見困學紀聞十一。又通志氏族略三。百里氏下不及井伯。略五。井氏下不及百里。亦以爲兩人也。

百里奚亡秦走宛。楚鄙人執之。繆公聞百里奚賢。欲重贖之。恐楚人不與。乃使人謂楚曰。吾媵臣百里奚在焉。請以五羖羊皮贖之。楚人遂許與之。

案。後漢書循吏傳注。唐李善文選陸機演連珠注引韓詩外傳論衡。竝言秦大夫禽息薦百里奚。當是也。此言繆公贖于楚。呂氏春秋慎人篇言公孫枝以五羊皮買之。而獻諸穆公。說苑臣術篇言賈人買以五羖羊皮。使將鹽車。與萬章言自鬻于秦。商鞅傳即萬章說。皆好事者爲之。言人人殊。不足辨已。戰國時造詞以誣聖賢。何所不有。韓子難言篇稱傳說轉鬻矣。況百里奚乎。或曰。此亦井伯事也。

而乞食銍人。

附案。徐廣銍作銍。是。

周王子頹好牛。臣以養牛干之。

案。此卽食牛要秦之說。孟子已辨其妄。變秦言周。其誣一矣。甯戚未遇。亦嘗飯牛。則鬻牛羊于市。奚未遇時或爲之。故孟子曰。舉于市。莊子田子方篇曰。奚飯牛而牛肥。穆公忘其賤。與之政。趙良曰。舉牛口之下。而世又號爲五羖大夫。蓋非盡無因也。特未若好事者之誕爾。史公好聚舊記。時插雜言。不惟與經相戾。且與商鞅傳矛盾。

事虞君。蹇叔止臣。臣知虞君不用臣。臣誠私利祿爵且留。再用其言得脫。一不用及虞君難。案。奚先去虞矣。何云及虞難。此卽見虜爲媵之說也。孟子稱奚智且賢。若私利祿爵。豈特不智不賢已哉。

秋。繆公自將伐晉。戰于河曲。

案。春秋河曲之戰。在魯文十二年。乃秦康公時事。下文書之。而此忽出斯語。相隔四十餘年。且戰在冬十二月。非秋也。蓋十一字是羨文。

太子申生死新城。重耳。夷吾出奔。

案。此從春秋書申生死于穆公五年。表從左傳書于四年。然二公子之出奔。春秋不書也。使百里傒將兵送夷吾。

案。傳是齊隰朋會秦師。納惠公。不言秦帥何人。此以百里傒實之。未知所出。

請割晉之河西八城與秦。

案。傳言許賂秦伯以河外列城五。此言河西八城。當誤以虢略等又爲三城也。

十二年。齊管仲。隰朋死。

案。齊世家在齊桓公四十一年。當魯僖。秦穆之十五年。此誤書于十二年也。是年桓公方使管仲平戎于王。隰朋平戎于晉。何以死哉。然其誤從穀梁傳來。穀梁于魯僖十二年。楚人滅黃。傳言管仲死耳。

晉早來請粟。

案此句上失書十三年。

僖曰夷吾得罪于君其百姓何罪。

案晉世家依內外傳以此爲穆公語非百里僖之言也。然外傳不及奚而以左傳所載奚語并入穆公口中元是不同。

十四年秦飢請粟于晉晉君謀之羣臣虢射曰因其飢伐之可有大功晉君從之十五年興兵將攻秦繆公發兵使丕豹將自往擊之。

案晉世家亦謂惠公用虢射謀不與秦粟而發兵伐之攷內外傳晉但不與粟而已未嘗有因飢伐秦之事秦之伐晉爲其三施無報豈因晉來攻而秦擊之乎且未嘗使丕豹將也又秦飢請粟在十四年冬戰于韓原在十五年九月寧有興兵閱四時而始交戰者此及世家皆誤。

吾將以晉君祠上帝。

案內外傳秦有殺惠公之議而無祀上帝之言此與晉世家竝非。

周天子聞之曰晉我同姓爲請晉君。

徐氏測議曰左傳周無請晉君之文初獲晉君亦未能遽及當是穆姬力也。

秦妻子圍以宗女。

案晉語秦伯曰寡人之嫡此爲才則懷嬴是穆公之女也此與晉世家言宗女非

十八年齊桓公卒

案齊桓卒于秦穆十七年此誤

二十年秦滅梁芮

案表書秦滅梁于十九年是此誤在二十年也至芮國之滅則不可攷左傳桓四年疏曰不知誰滅之

無錫顧氏棟高春秋大事表引汲冢書滅芮在秦穆公二年今竹書無之當是引路史國名紀注也見卷五亦與史不合通志

氏族略云芮爲晉所滅又未知何據

秦繆公將兵助晉文公入襄王殺王弟帶

案左傳云晉侯辭秦師而下晉語子犯云秦將納之則失周矣是秦未嘗助晉納王也晉世家與左氏

合此誤

鄭人有賣鄭于秦

案賣鄭者卽戍鄭之秦大夫杞子也而此與晉世家以爲鄭人何歟據鄭世家或者鄭司城繒賀與杞

子比而賣鄭乎

使百里傒子孟明視蹇叔子西乞術及白乙丙將

案史公敍襲鄭之事依公穀故與左傳異然公穀但云二老哭送其子而已未嘗謂三帥卽其子也乃

史取而實之。杜世族譜以術丙蹇叔子爲妄記異聞。甚是。而杜因左傳稱百里孟明視。譜遂以孟明是奚之子。亦未可全信。呂氏春秋悔過篇。蹇叔有子曰申與視。注。申。白乙丙。又以孟明視爲蹇叔子。唐書宰相世系表。更以西乞白乙爲孟明子。踵謬仍譌。真史通所謂李代桃僵者矣。

滑、晉之邊邑也。

案。穀梁曰。滑國也。攷春秋莊十六年。滑伯始見于經。至此爲秦所滅。故經書秦人入滑。其後成十三年。

晉使呂相絕秦。所謂殄滅我費滑者。邊邑云乎哉。杜釋例土地名云。滑國都于費。河南濮氏縣。

文公夫人秦女也。爲秦三囚將請曰。繆公之怨此三人。

案。史詮云。時穆公未卒。不宜以謚稱。當如下文稱我君。余因歷攷之家。令說太公曰。今高祖雖子人主。

也。高祖紀。齊內史說王曰。太后獨有孝惠與魯元公主。張辟彊謂丞相曰。太后獨有孝惠紀。呂后。屈宜白曰。

昭侯不出此門。六國表。陳乞謂諸大夫曰。高昭子可畏。齊世家。管叔及羣弟流言曰。周公將不利于成王。周

公告太公。召公曰。成王少。戒伯禽曰。我成王之叔父。病將沒。曰。必葬我成周。以明吾不敢離成王。公子

揮譖曰。隱公欲遂立。請爲子殺隱公。子家曰。齊景公無信。六卿爲言曰。晉欲內昭公。魯世家。夫人曰。此靈

公命也。衛世家。華督使人宣言國中曰。殤公即位十年耳。叔瞻曰。成王無禮。宋世家。宰孔曰。齊桓公益驕。重

耳曰。齊桓公好善。齊使曰。蕭桐姪子。頃公母。頃公母猶晉君母。晉世家。國人每夜驚曰。靈王入矣。弃疾使

人呼曰。靈王至矣。吳謂隨人曰。欲殺昭王。隨人謝吳王曰。昭王亡不在隨。齊湣王遺楚王書曰。今秦惠

王死。武王立。楚世家。莊公曰。武姜欲之。子亶曰。厲公居櫟。內厲公。楚共王曰。鄭成公孤有德焉。鄭世家。延陵

季子曰。晉國之政。卒歸于趙武子。韓宣子。魏獻子之後矣。趙世家。屈宜臼曰。昭侯不出此門。昭侯嘗利矣。

昭侯不以此時卹民之急。韓世家。田乞給大夫曰。高昭子可畏也。齊人歌曰。歸乎田成子。田完世家。孔子曰。

趙簡子未得志之時。孔子世家。太后曰。傳教孝惠。陳丞相世家。公叔之僕曰。君因先與武侯言。武侯即曰。奈何。

君因謂武侯。吳起傳。子羔謂子路曰。出公去矣。弟子傳。韓慶曰。謂秦昭王出楚懷王。孟嘗君傳。新垣衍謂趙王

曰。尊秦昭王為帝。魯仲連傳。賈高等說王曰。今王事高祖甚恭。而高祖無禮。張敖曰。賴高祖得復國。秋豪

皆高祖力也。賈高等曰。今怨高祖辱我王。呂后數言張王以魯元公主故不宜有此。張耳傳。此史記中預

以諛稱之者。凡斯衆端。皆史家記事之失。後人載筆。或可先稱其諛。若述當時人語。則是生而諛矣。然

其誤不始于史公。如禮記。孔子曰。季桓子之喪。衛君請弔。哀公辭。不得命。康子立于門右。曾子問。左傳。石

碯曰。陳桓公方有寵于王。隱五年。公羊傳。公子翬曰。吾為子口隱矣。竝是生時稱諛。經典明文。尚不免此

病。其他諸子雜記。不可枚舉。若困學紀聞。日知錄所引者。不過撮述數條而已。顧氏云。自東京以下。即

無此語。穆天子傳。河伯號帝曰穆滿。

繆公于是復使孟明視等將兵伐晉。戰于彭衙。秦不利。引兵歸。

案。年表依春秋。書彭衙之戰于三十五年。此在三十四年。誤。又是役也。秦師敗績。何云不利引歸。必秦

史諱之。史公仍其誤耳。

繆公怪之。問曰：中國以詩書禮樂法度爲政。然尙時亂。今戎夷無此。何以爲治。不亦難乎。由余笑曰：此乃中國所以亂也。

史刻曰：所貴乎有賢者。爲其能治人國家。治人國家。舍詩書禮樂法度無由也。今由余曰：是六者中國之所以亂。不如戎夷無之爲善。而穆公用之。則亡國無難。若之何其能霸哉。是特老莊之徒。設爲此言。以詆先正之法。太史公遂以爲實而載之。過矣。

于是繆公退而問內史廖。

案韓詩外傳九作王繆。

取王官及郟。

附案郟字譌。當依左傳作郊。正義郟音郊。非也。

封殺中尸爲發喪。哭之三日。乃誓于軍。

案秦誓書序謂敗曠還歸而作。先儒多從之。而史公繫于封殺尸之後。前編依以爲說。攷古質疑謂史誤。四書釋地又續曰：王伯厚亦莫能折衷。但云二書各不同。以左傳攷之。誓當作于僖三十三年。夏秦伯素服郊次。鄉師而哭之。日不作于文。三年夏封殺尸。將霸西戎之時。蓋霸西戎則其志業遂矣。豈復作悔痛之詞哉。

君子聞之。皆爲垂涕。曰：嗟乎。秦繆公之與人周也。卒得孟明之慶。

溥南集辨惑曰。左氏云。君子是以知秦穆公之爲君也。舉人之周也。與人之壹也。至于孟明。子桑。皆有贊美之詞。凡左氏所謂君子者。蓋假之以爲褒貶之主。而非指當時之士也。安有所謂聞之垂涕者哉。益國十二。開地千里。

案千里之地。或能開闢。而益國十二。則未敢爲信。匈奴傳言八國服秦。當是。此誤。仍韓子十過篇。非其實也。李斯傳云。并國二十。文選上始皇書作并國三十。漢書韓安國傳。秦繆公并國十四。竝非。子書中如荀子仲尼篇。齊桓公并國三十五。韓子有度篇。荆莊王并國二十六。齊桓公并國三十。難二篇。晉獻公并國十七。服國三十八。呂氏春秋貴直篇。晉獻公兼國十九。真諫篇。楚文王兼國三十九。說苑正諫篇。荆文王兼國三十。同一妄也。

天子使召公過賀繆公以金鼓。

案。召公諡武名過。湖本誤以過字屬下句。但攷國語。召武公過爲召昭公之父。而左傳僖十一年書召武公之後。不復見。至文五年書召昭公來會葬。則武公已前卒矣。繆公金鼓之賀。在魯文四年。其爲召昭公無疑。豈有父子同名之理。必此誤耳。

收其良臣而從死。

附案。史公所說。本于左傳。文選王仲宣詩所謂臨歿要之死。焉得不相隨也。然攷漢書匡衡傳注。應劭曰。穆公與羣臣飲酒。酒酣。公曰。生共此樂。死共此哀。奄息等許諾。及公薨。皆從死。則是三良下從穆公。

出于感恩戴德之私而非穆公命之殉也。曹子建詩：秦穆先下世，三臣皆自殘。生時等榮樂，既歿同憂患。蘇東坡詩：昔公生不誅孟明，豈有死之日而忍用其良？乃知三子殉公意，亦如齊之二子從田橫。俱本應氏說。烏得云穆公奪之善人哉？昔賢謂三良死非其所欲，與梁丘據、安陵君同讖，非偏論已。柳子厚詩：疾病命固亂，魏氏言有章。從邪陷厥父，吾欲討彼狂。東坡晚年和陶詩又云：殺身固有道，大節要不虧。君爲社稷死，我則同其歸。顧命有治亂，臣子得從違。魏顥真孝愛，三良安足希。刺三良而責康公，所見益高。

是知秦不能復東征也。

日知錄曰：秦至孝公而天子致伯，諸侯畢賀，其後始皇遂并天下。左氏此言不驗，史公何以并錄之乎？秦伐晉於武城。

案於乃取字之誤。左傳及年表可證。戰于河曲，大敗晉軍。

案文十二年左傳云：戰交綏，秦師夜遁。此以爲大敗晉軍，妄矣。年表及晉世家言大戰，亦非。杜注：古名退軍爲綏。秦晉兩退，故曰交綏。

乃使魏讎餘詳反。正義謂又作讎，非。

附案：晉世家作壽餘，與左傳合，而此獨以壽爲讎者，蓋古通借用字。春秋繁露循天道篇云：壽之爲言

讎也。

子共公立。

案共公失書名。

共公立五年卒。

案年表及秦記竝作五年。攷秦共四年。當魯宣四年。而春秋宣四年書秦伯稻卒。則共公不得有五年也。史誤以秦桓元年為共公五年爾。

晉敗我一將。

附案晉世家作虜秦將赤。攷年表書獲諜。即左傳宣八年殺秦諜之事也。索隱云赤即斥。謂斥侯之人。彼諜即此赤也。然既稱為諜。不得號曰將。欲稱為將。不得復曰赤。豈秦將名赤者。詐為細作。而被晉獲之歟。史必別有所據。故紀表世家所書各異。蓋互見耳。索隱謂赤為斥。疑古字通。水經洹水注縣南角有斥丘。明朱謀埠注箋云舊本作赤丘也。

十年楚莊王服鄭。

附案十年乃七年之譌。

桓公立二十七年卒。子景公立。

案史誤減桓之一年以益共公。故作二十七。其實二十八年也。紀表俱誤。桓景之名。春秋史記皆失書。

宋程公說春秋分記及皇王大紀謂桓公名榮。當別有據。至集解索隱皆引世本謂景公名后伯車。則誤甚。攷左傳景公母弟鍼。字伯車。又字后子。安得移作景公之名。春秋分記謂景公名石也。又景公索隱引始皇紀作哀公。而始皇紀無哀公之文。況秦別自有哀公乎。蓋秦記誤稱景公爲僖公。小司馬欲兩存之。復誤以僖作哀爾。

晉悼公彊數會諸侯。率以伐秦。敗秦軍。秦軍走。晉兵追之。遂渡涇至械林而還。

案襄十四年左傳。械林之軍。是晉遷延之役也。未嘗交兵。有何敗走追逐之足云。乃此與晉世家言晉敗秦。而年表又言秦敗晉。竝妄。

二十七年。景公如晉。與平公盟。已而背之。

案左氏襄二十六年經文前傳曰。會于夷儀之歲。秦晉爲成。晉韓起如秦。涖盟。秦伯車如晉。涖盟。成而不結。杜注云。在二十四年。而特跳此者。傳寫失之。魯襄二十四年。當秦景二十八年。乃年表既誤書此事于二十九年。而紀又誤在二十七年。且是盟也。伯車如晉。非秦景自行。紀表皆言景公如晉。豈史公亦謬以伯車爲景公名邪。成而不結。故後二年伯車如晉。脩成。秦未嘗背晉。此又紀之誤。

哀公八年。楚公子弃疾弑靈王而自立。是爲平王。

附案。昭十三年春秋。弑靈王者。是公子比。而史于秦紀及吳魯蔡曹陳衛宋鄭八世家。皆稱弃疾。斯乃史公特筆。雖與春秋異詞。不免背經信傳。而于誅首惡之旨。固合。故小司馬于吳世家云。史記以平王

遂有楚國。故曰弃疾弑君。春秋以子干爲王。故曰比弑其君。彼此各有意義也。

十一年。楚平王來求秦女爲太子建妻。至國。女好。而自娶之。

案。年表及楚世家在平王二年。爲秦哀公十年。此在十一年。竝誤。攷左傳在魯昭十九年。爲秦哀十四年也。

孔子行魯相事。

案。相乃僭相。卽會夾谷之事。非當國爲相也。此紀及吳、齊、晉、楚、魏五世家。伍子胥傳竝誤。說在孔子世家。中。

五年。晉卿中行、范氏反晉。晉使智氏、趙簡子攻之。范、中行氏亡奔齊。

案。此所書有三誤。事在秦惠公四年。非五年事一也。伐范、中行者。知、韓、魏三家。趙簡子已奔晉陽。竝不與攻范、中行氏。二也。范、中行之奔齊。在秦悼公二年。首尾相去八歲。是時但奔朝歌耳。三也。

惠公立十年卒。

案。此與秦記及侯表皆以爲十年。然攷春秋哀三年。書秦惠公卒。魯哀三年。當秦惠九年。則秦惠無十年明矣。史皆誤。

六年。吳敗齊師。

案。哀十年左傳。乃齊敗吳師也。此誤。

十二年齊田常弑簡公。

案事在秦悼十年。此誤書于十二年也。

秦悼公立十四年卒。

案悼公享國十五年。秦記可證。史謬加惠公在位九年爲十年。遂減悼公十五年爲十四年。此與表同誤。

孔子以悼公十二年卒。

案孔子之卒。止宜書于周魯。餘可不書也。若以爲天下一人不可不書。則各國皆宜書。又何以僅書于周秦兩紀。魯燕陳衛晉鄭六世家乎。史記中斯類甚多。亦體例之參錯可議者。附論于此。不及徧舉。殺智伯分其國。

案智伯不可言國。當改曰分其邑。

蹠公二年南鄭反。

大事記曰。水經注。南鄭縣卽漢中郡治也。秦惠王始取楚漢中。置漢中郡。今蹠公之時。已書南鄭反。豈地之往來不常。先嘗屬秦歟。六國表。厲共公二十六年。已先書城南鄭矣。

義渠來伐。至渭南。

盧學士曰。渭南六國表作渭陽。水北曰陽。若據表。則渭南爲非矣。

靈公六年。晉城少梁。秦擊之。

附案。六國表。戰在七年。大事記云。出師在六年。而戰在七年。

十三年。城籍姑。

案。靈公在位止十年。卽卒于城籍姑之歲也。安得十三年乎。三字衍。

十六年卒。

案。表及秦記皆作簡公在位十五年。是也。此言十六年。誤。但索隱引紀年云。簡公九年卒。次敬公立十

二年。秦記引作乃立惠公。與史不同。所謂詞卽難憑。時參異說者矣。

惠公十二年。子出子生。

案。表謂十一年生。未知孰是。但秦之先已有出子矣。不應復以稱惠公太子。表及秦記竝稱爲出公。是

也。世本作少主。呂氏春秋作小主。

十三年。伐蜀。取南鄭。

案。紀表前此書秦城南鄭及南鄭反矣。則南鄭非蜀土也。史詮曰。史表。蜀取我南鄭。當從史表爲是。

庶長改迎靈公之子。獻公于河西而立之。殺出子及其母。沈之淵旁。

案。呂氏春秋當賞篇。述獻公自魏入立事。言獻公園小主。夫人。夫人自殺。與此言被殺沈淵異。

獻公元年。

案秦諸君多失名。呂氏春秋稱獻公爲公子連。高誘注。一名元。非也。則獻公名連。史何以不書。索隱謂名師隰。未知所出。又秦記索隱引世本作元。獻公疑史脫元字。蓋兩字諡也。越絕書外傳記地謂之元王。秦追尊之爾。

合七十七歲而霸王出。

案七十七歲似誤。辨在周紀。

十八年。雨金櫟陽。

案前靈公作上下時。獻公此年又作哇時。紀中諸時皆書。而獨缺三時。何邪。表亦失書。

天子賀以黼黻。

附案。宋婁機班馬字類引史作黼黻。又引正義曰。雖非字體。歷代史記本同。見論然則今本改爲黼旁也。

虜其將公孫痤。

案年表于秦。魏二表皆言虜太子。蓋因齊虜魏太子申而誤。事在後二十一歲。而此紀及魏世家作公孫痤。趙世家作太子痤。皆誤。蓋秦虜公孫痤。非太子也。魏無二太子。太子名申。不名痤也。痤氏公叔。非公孫也。當依國策稱公叔痤爲是。商君傳與策同。所可疑者。痤旣被虜矣。而商君傳仍國策載公叔痤病薦衛鞅之事。豈秦虜之而復歸之歟。

二十四年獻公卒。

案獻公在位年數。秦記六國表竝稱二十三年是也。此作二十四。世本作二十二。越絕書作二十。皆誤。子孝公立。

案索隱云。孝公名渠梁。而越絕稱爲平王。蓋秦稱王之後。加諡追尊。若獻公之稱王矣。孝公元年。河山以東疆國六。與齊威。楚宣。魏惠。燕悼。韓哀。趙成侯竝。

案是時燕乃文公。非悼公也。韓乃懿侯。非哀侯也。

楚自漢中南有巴黔中。

附案。史證曰。一本巴作巫。巴地屬秦。非屬楚也。

與魏惠王會杜平。

案。年表亦稱魏王。非也。當衍王字。大事記曰。魏是時未稱王。

衛鞅爲大良造。將兵圍魏安邑。降之。

案。安邑。魏之都。其君在焉。攷魏惠王三十一年。自安邑徙大梁。是秦孝公廿二年也。魏昭王十年。獻安邑于秦。是秦昭王廿一年也。而此時爲魏惠王十九年。秦孝公十年。豈得圍而便降。且使此時已降。則惠王徙都。不待十二年之後。而安邑舊都。又何煩魏昭再獻乎。蓋安邑二字。乃固陽之誤。據表及魏世家。惠王十九年。築長城。塞固陽。二十年。秦商鞅圍固陽。降之。卽此事也。紀表與商君傳俱誤作安邑。惟

魏世家無之。固陽之役，必圍在十年而降在十一年。

四十一縣。

案四字疑誤。年表及商君傳竝作三十一。

二十四年與晉戰鴈門。

案表在二十三年。又鴈門乃岸門之誤。小司馬已辨之。

孝公卒子惠文君立。

案越絕書謂孝公立二十三年。與史言二十四年異。疑誤也。至秦記索隱引本紀云十二年。乃下文十

三年都咸陽注。錯入于孝公享國二十四年句下耳。索隱云惠文名駟。本後書西羌傳呂覽首時去宥

篇注。必別有據。史失書。

三年王冠。

案惠文稱王在十三年。此與表俱于前三年書王冠。雖是追書。然于史例不合。又大事記曰。秦記惠文

王昭襄王皆生十九年而立。若二十而冠。則當在元年。而本紀皆書于三年。兩書必有一誤也。

齊魏爲王。

案田完世家威王二十六年。自稱爲王。當秦孝公九年。已先二十年爲王矣。而此書于惠文四年。豈因

魏而誤連言之歟。宜衍齊字。

六年魏納陰晉

附案漢地理志謂在五年疑非

七年公子卬與魏戰虜其將龍賈斬首八萬

案此卽所謂雕陰之戰也惠文七年爲魏襄四年襄當作惠表又書于魏襄二年當惠文五年皆誤宜依

魏世家在襄五年當惠文八年爲是至斬首之數亦宜依世家作四萬五千蓋秦尙首功紀仍秦史之

虛語耳余因攷之秦自獻公廿一年與晉戰斬首六萬孝公八年與魏戰斬首七千惠文八年與魏戰

斬首四萬五千後七年與韓趙戰斬首八萬十一年敗韓岸門斬首萬十三年擊楚丹陽斬首八萬武

王四年拔韓宜陽斬首六萬昭襄王六年伐楚斬首二萬七年復伐楚斬二萬十四年攻韓魏斬二十

四萬廿七年擊趙斬三萬三十二年破魏將暴鳶斬四萬三十三年又伐魏斬四萬三十四年破魏將

芒卯斬十三萬沈河二萬四十三年攻韓斬五萬四十七年破趙長平坑卒四十五萬五十年攻晉軍

斬首六千流死河二萬人五十一年攻韓斬四萬攻趙斬九萬始皇二年攻卷斬首三萬十三年攻趙

斬首十萬計共一百六十六萬八千人而史所缺略不書者尙不知凡幾從古殺人之多未有如無道

秦者也

圍焦降之

案秦兼降曲沃故後三年歸魏焦曲沃也此與六國表內秦表及魏世家俱失書曲沃二字

十一年縣義渠

案縣義渠三字乃羨文。是年義渠為臣，非為縣也。其後九年五國伐秦，義渠襲秦于李帛之下。見犀首傳。又後三年秦伐義渠，取二十五城。至秦武王元年復伐義渠。兪本紀及年表又范雎傳秦昭王曰：義渠之事，寡人旦暮自請太后。今義渠之事已，寡人乃得受命。匈奴傳曰：昭王時義渠戎王與宣太后亂，有二子。太后詐殺戎王于甘泉，遂起兵伐殘義渠。蓋是時始縣之。大事記謂赧王四十四年秦滅義渠，當是已。而于此年云：雖以為縣，猶令其君主之，則非也。報四十四當秦昭三十六若如此所書，惠文前十一年已滅為縣，則必更置令長丞尉，惟命是聽，安得後此有如許事乎？

歸魏焦、曲沃

案前二年秦攻取汾陰、皮氏、焦、曲沃四邑，今歸魏焦、曲沃。則是秦祇取汾陰、皮氏兩縣也。竹書載秦取汾焦、曲沃、較但此紀昭王十七年書秦以垣為蒲坂、皮氏。為當年表魏世家樽里甘茂傳竝言昭王初年秦攻皮氏，未拔，去竹書隱王八年秦公孫爰。疑即樽里子樽里為秦惠王弟稱公孫疾譏爰伐皮氏，翟章救皮氏。九年城皮氏，余因疑秦歸魏焦、曲沃之時，并皮氏亦歸之。紀表世家俱脫不書耳。不然皮氏已為秦取久矣，尚何煩用師乎？

十三年四月戊午魏君為王，韓亦為王。

案魏惠稱王在惠文四年，此紀已書之。而是年紀與秦表復書魏君為王，何歟？周紀正義引秦紀云：惠

王十三年與韓、魏、趙竝稱王。所引與此異。且秦紀無其文。當必有誤。蓋是年秦惠稱王。故書月書日以別之。魏字乃秦字之誤。燕世家書燕君為王。是其例也。若表中魏字乃羨文。表例但書君為王也。不然魏君為王。奚以入于秦表乎。至韓宣惠為王。在秦惠更元之二年。誤書于是年耳。

使張儀伐取陝。

案表及儀傳事在惠文後元年。此誤書于十三年也。

張儀與齊、楚大臣會齧桑。

案此與表及儀傳皆缺書魏。楚世家云。張儀與楚、齊、魏相盟。是也。齊、魏二世家但言諸侯執政而已。

樂池相秦。

案後此五年。趙武靈王使樂池送燕公子職為燕王。則池是趙人。與樂毅為一族。何緣為相于秦乎。疑

韓、趙、魏、燕、齊帥匈奴共攻秦。秦使庶長疾與戰脩魚。虜其將申差。敗趙公子渴。韓太子奂。斬首八萬二千。

案此事諸處所載互有不同。余詳校之。攻秦者實燕、楚、趙、魏、韓、齊六國。而匈奴不與焉。攷楚世家云。六

國攻秦。楚懷王為從長。楚為從長。所書自當不謬。大事記據之。是也。此紀不及楚。年表及燕世家不及

齊。趙世家但言與韓、魏擊秦。魏世家及犀首傳俱言五國攻秦。樂毅傳不及燕、楚。韓、齊世家竝略之。皆

錯失不足憑。而賈生過秦論又稱九國之師。索隱曰。六國之外更有宋、衛、中山。豈攻秦一役。宋、衛、中山共以兵從。如匈

奴之屬六國歟。是時義渠亦伐秦。若并數之。則為十一國矣。司馬光資治通鑑依年表作五國。非。而高誘國策注以齊、宋、韓、魏、趙為五國。尤非。

秦之戰敗韓、趙。在次年。秦惠八年。與今本殊。蓋以意言之。不與攻秦同歲。年表各世家可證。此紀并入七年。誤。樛里傳案。隱引秦紀。以圖秦及戰脩魚在八年。

蓋六國雖同出師。不相應領。故惟韓、趙戰秦。韓、趙既敗。四國遂引歸不戰。而齊乘趙、魏之弊。復敗之于觀澤。齊真叵測哉。韓公子渴、韓大子兔乃是主帥。申差特韓之一將爾。以後文韓太子倉推之。知兔已死矣。意彼時渴、兔均敗沒。申差其生獲者也。然韓世家謂承虜鯁、申差則生獲不止一將。乃何以此紀既失書鯁。而又混稱虜其將申差。幾莫辨爲趙將爲韓將。或云其將。是韓將之誤。六國表及張儀傳皆不書主帥。亦不書鯁。而但言申差。韓世家書二將而反失書主帥。未免乖駁。至斬首之數。表及趙世家、張儀傳皆云八萬。此紀增多二千。因紀仍秦史之舊。而秦尙首功。虛加其級耳。

伐取趙中都、西陽。

案此與表同誤。惟趙世家作西都、中陽。是也。攷漢志地屬西河郡。若中都屬太原。西陽屬山陽。名異地殊。未可相混。正義謂中都卽西都。西陽卽中陽。謬甚。

十年。韓太子蒼來質。

案韓世家太子之質。在破岸門後。當在十一年。

伐敗趙將泥。

案徐廣曰。將一作莊。則是姓莊名泥也。而表作將軍英。姓乎名乎。不可詳矣。

伐取義渠二十五城。

案表在十一年。此在十年。未知孰是。

樗里疾攻魏焦。降之。敗韓岸門。斬首萬。其將犀首走。

附案。其將犀首走五字。當在降之句下。蓋錯簡耳。犀首。魏官。即公孫衍。與韓無涉。故魏表及魏世家云。

走犀首岸門。

公子通封于蜀。

附案。表作繇通。非。公子繇乃別一人。見張儀傳。華陽國志作通國。

燕君讓其臣子之。

案。事在後九年。此誤書于後十一年。

虜趙將莊。

案。表及趙世家作趙莊。正義謂一作莊。非。則莊其名也。而樗里傳又作莊豹。則莊其姓也。疑莫能定。

楚圍雍氏。

案。雍氏之役。莫定何年。六國表不書也。楚世家不書也。惟周。秦二紀及齊。韓二世家。甘茂傳書之。然時

既各殊。事頗不合。秦紀書于惠文王後十三年。與齊世家書于湣王十二年。同是周赧王三年。徐廣韓

引紀年。于此亦說楚景翠。今本無。蓋誤。韓世家書于襄王十二年。是赧王十五年。紀年與韓。世家同。皆誤也。而注國策注史記

者。不復詳攷。遂謂楚兩度圍韓雍氏。以赧王三年為前所圍。取秦與韓敗楚丹陽事當之。以赧王十五

年爲後所圍。取秦敗楚新城事當之。夫丹陽之與雍氏相去遠矣。策及傳稱秦宣太后攻赧王三年爲惠文後十三年。惠文未薨。昭王未立。安得有宣太后邪。新城之與雍氏亦甚遠矣。策及世家稱甘茂攻茂之懼讒出奔。在秦昭元年。而赧王十五年爲昭王七年。茂久去秦相位。尙何收鹽之言哉。蓋注者之誤。由于策記錯亂。因生此異端耳。其實圍雍止有一役。楚未嘗再舉。策記未免交混。而其事非丹陽新城也。其時非赧王三年十五年也。周紀茂傳固可據也。周紀書于赧王八年之後。次年卽秦昭元年。故茂傳云。昭王新立。太后楚人。不肯救韓。茂爲言于王。乃下師殺以救之。而救韓之師。傳叙于茂伐魏蒲坂之先。蒲坂未拔。茂亡奔齊。皆昭王元年事也。然則圍雍一役。其在赧王九年。秦昭元年。韓襄六年。楚懷二十三年乎。

秦使庶長疾助韓而東攻齊。到滿助魏攻燕。

案。表及魏世家。乃助魏攻齊耳。是時無韓伐齊事。正義滿。或作蒲。非。

十四年伐楚。取召陵。

案。其時秦楚復親。不相攻伐。此役無攷。當屬誤文。

相壯殺蜀侯來降。

案。華陽志。陳壯反。殺蜀侯通國。秦遣甘茂、張儀、司馬錯伐蜀。誅壯。是壯未嘗來降。二說以志爲實。莊壯

二字古通用。有說在高祖功。臣表廣侯下。故國策作莊。而史記紀表。華陽志作壯。惟徐廣謂一作狀。乃譌本也。

子武王立。

案武王之謚。此與表同。而秦記及正義引括地志。法言淵齋篇作悼武。索隱引世本及高誘呂氏春秋。序作武烈。越絕書又作元武。未知孰是。疑悼武爲定也。索隱云。名蕩。

韓、魏、齊、楚、越皆賓從。

附案。越字誤。徐廣謂一作趙。是也。竹書載越世次最詳。然七國時越不與攻伐盟會之事。故知越賓從。秦爲誤。

與魏惠王會臨晉。

案。惠王乃襄王之誤。年表所謂哀王也。

南公揭卒。

附案。南公揭不知何人。項羽紀稱南公。漢藝文志陰陽家有南公三十一篇。注云。六國時。蓋當時有道之士。揭豈其人歟。

樽里疾相韓。

案。疾無相韓事。時疾以右丞相出使于周。見本傳。疑相韓二字是使周之誤。

烏獲孟說。

案。烏獲已見文子自然篇。此何以稱焉。豈古力士有兩烏獲。如善射之名羿歟。孟說未知卽孟賁否。
後書

蓋勳傳有譚羌校尉夏青。王商傳有中常侍孟賁。亦類此。

王與孟說舉鼎絕臚八月武王死。

案史公子武王獨變卒稱死豈以絕臚故歟。徐廣臚作脈似較勝。但甘茂傳言武王至周而卒于周。與此紀及趙世家異。何也。武王在位四年。索隱于秦記引世本作三年。非。

是為昭襄王。

案趙世家昭襄名稷。紀表皆失書。甘茂傳索隱引世本名側。此紀索隱謂則蓋音相近。若齊稷門之為側門矣。

甘茂出之魏。

案傳茂奔齊復至楚而終于魏。此言茂出之魏恐是齊之誤。大事記曰時方伐魏自魏而奔齊也。

四年取蒲坂。

案年表魏世家是年秦拔魏蒲坂晉陽封陵。此缺。

魏王來朝應亭。

案應亭乃臨晉之誤。年表魏世家可證。

蜀侯輝反。

案華陽國志赧王十四年蜀侯輝祭山川獻饋于秦。輝後母害其寵加毒以進王大怒遣司馬錯賜輝劍自殺。據此則紀表言反者乃仍秦史誣詞而非其實也。輝此作輝字形相近未知孰是。

涇陽君質于齊。

案年表田完世家在七年此誤書于六年。

攻楚取新市。

附案年表楚世家云取八城而此言新市蓋新市為八城之大者舉其重言之猶世家所謂取析十五

城也。實取十城也六城。

共攻楚方城取唐昧。

案事在秦昭六年表及諸世家可證此誤書于八年也又此以為方城而表及楚與田完二世家樂毅

傳竝作重丘元胡三省通鑑注辨之云春秋時有二重丘衛孫蒯飲馬于重丘杜曰曹邑諸侯同會于

重丘杜曰齊地時楚之境皆不至此呂氏春秋處方齊令章子與韓魏攻荆荆使唐蔑將兵應之夾泚

而軍章子夜襲之斬蔑于是水之上水經注泚水又西澳水注之水北出此丘山南入于泚水意者重

丘即此丘也據胡所說但辨重丘而不及方城今河南南陽裕州楚方城地內鄉縣東亦有方城也余

又攷荀子議兵篇云兵殆于垂沙唐蔑死韓詩外傳四淮南兵略同商子弱民篇及禮書沙作涉唐楊倞注垂沙未詳所在漢志沛

國有垂鄉豈垂沙乎胡注亦未及一作比漢志南陽郡比陽是後書光武紀上作泚

趙破中山其君亡竟死齊。

案事在秦昭六年當趙武靈王廿五年此誤書于昭王八年也言死齊亦非說見表。

九年孟嘗君薛文來相秦。

案相薛文在八年。

免攻楚取八城殺其將景快。

案秦昭八年取楚八城九年取楚十六城此書于九年不知誤以八年事爲九年歟抑誤以十六城爲八城歟前二年秦殺楚將景缺此又殺景快二景必弟兄也。

十年楚懷王入朝秦秦留之。

案懷王入秦在八年。

薛文以金受免。

案正義以金受爲秦丞相姓名謂秦相金受故免薛文也而方氏補正曰薛文相秦中間無金受相秦事金受名別無所見恐傳寫之誤蓋薛文以金受免耳余攷孟嘗傳秦昭王以爲相人或說昭王曰孟嘗君相秦必先齊而後秦秦其危矣于是昭王乃止囚孟嘗君疑金受卽說昭王之人不知是否又文之免相在九年此亦誤在十年也。

十一年齊韓魏趙宋中山五國共攻秦至鹽氏而還秦與韓魏河北及封陵以和。

案紀有五誤伐秦止韓魏齊策所云三國攻秦者六國表孟嘗傳同乃此增趙宋中山爲五國一也攻秦臨函谷關策所云入函谷者韓魏田完世家孟嘗傳同乃此謂至鹽氏二也秦和三國以武遂與韓。

封陵與魏齊城與齊策所云秦以三城講于三國者。乃此及表皆不言齊。田完世家亦不言與我齊城。反載與韓河外。又不及魏三也。武遂封陵在河外。故三國世家俱稱河外。策作河東。此作河北。蓋自秦言之曰東。自三國言之曰北。而統言之曰河外。乃此以爲河北及封陵四也。當改河北是役在秦昭九年。乃此書于十一年五也。又伐秦講和本一時事。而表與各世家分伐秦在秦昭九年。講和在十一年。尤誤。大事記糾之矣。依本文是六國亦一誤也。

楚懷王走之趙。趙不受。

案。懷王亡趙。在秦昭十年。非十一年也。

左更白起。

案。此是昭王十三年。攷起傳。十三年爲左庶長。明年遷左更也。左庶長爲第十爵。左更第十二。

五大夫禮出亡奔魏。

案。穰侯傳言呂禮奔齊。孟嘗傳有禮相齊事。此誤也。大事記亦以奔魏爲非。

虜公孫喜拔五城。

案。上文言魏使公孫喜攻楚。則喜是魏將也。故穰侯傳稱虜魏將公孫喜。乃此紀及白起傳不言喜爲何國之將。而六國表書虜喜于韓表中。韓世家謂使公孫喜攻秦。秦虜喜似喜又爲韓將矣。蓋伊闕之役。韓爲主兵。而實使魏之公孫喜將之。故所書不同。未定是誤爾。但周魏策云。戰于伊闕。殺犀武。周本

紀曾及之。而史叙戰伊闕事。各處皆不及殺魏將犀武。豈以武非主帥歟。又此及起傳言拔五城。未知所拔者。魏城乎。韓城乎。殊欠分明。

十五年。大良造白起攻魏取垣。復子之。

案下文十七年書秦以垣易蒲坂。皮氏。十八年書攻垣取之。則起未嘗以垣予魏也。當衍復子之三字。白起傳但言拔垣。可據。

再免。

案穰侯魏冉凡三相三免。紀表皆不盡書。而紀與傳所書之年。亦多舛戾不合。余綜攷之。冉初爲相。在昭王十二年。至十五年免。此書冉免于十六年。誤也。再相在十六年。至二十一年免。此紀下文于廿四年書魏冉免相者。誤也。三相在二十六年。至四十二年免相。出就封邑。傳所謂免二歲復相秦者。乃免四歲之誤也。傳稱復相四歲拔郢。故知其誤。若免二歲復相。則當云六歲拔郢矣。

封公子市宛。公子悝鄧。

附案市者。涇陽君也。悝者。高陵君也。索隱于此處不誤。而于蘇秦穰侯傳謂涇陽爲悝。誤矣。又云高陵名顯。則是誤以秦末齊王田市之使者高陵君顯爲秦公子也。顯見項羽紀。張冠李戴。可哂之甚。

城陽君入朝。

附案。成陽君是韓人。魏策有之。史漢中成與城多通用。注家皆略。故著之。

秦以垣爲蒲坂皮氏。

附案。索隱云。爲當爲易。蓋字譌也。而水經注四引薛瓚曰。秦世家以垣爲蒲反。作如字讀。非。稱秦本紀爲秦世家。亦創師古注漢地理志。亦不取瓚說。

齊破宋。宋王在魏死。溫。

案。事在秦昭二十一年。此誤書于十九年也。

涇陽君封宛。

案。涇陽。高陵二公子。已于十六年同封。此誤重出。

蒙武伐齊。河東爲九縣。

案。蒙恬傳。蒙武乃蒙騫之子。騫事昭王。至始皇四世。則此時擊齊者。必是騫而非武也。河東上疑有脫

字。古史作取河東。

二十三年。尉斯離與三晉。燕伐齊。破之。濟西。

案。伐齊之役。實秦、楚、燕、趙、韓、魏六國也。燕、齊、楚三世家可證。此紀與趙、魏世家失書楚、韓世家止言與秦攻齊。孟嘗君傳失書韓、楚。樂毅傳失書秦。年表六國皆有擊齊。及取齊某地之文。元未嘗誤。然或稱與韓、魏、燕、趙。或稱與秦。或稱與秦、三晉。或稱五國。參錯不一。自序傳亦言連五國兵。蓋竝屬脫誤耳。荀子王制篇。閔王毀于五國。注云。史記齊閔王四十年。樂毅以燕、趙、楚、魏。秦破齊。非也。當依王霸篇注。燕

秦、楚、三晉伐齊爲是。呂覽權勳篇。五國攻齊。注謂燕、秦、韓、魏、趙亦非。

秦取魏安城。至大梁。燕、趙救之。

案。各處皆不言燕、趙救魏。攷是年爲燕昭王廿九年。趙惠文王十六年。燕昭新破齊。潁方圍莒。卽墨未下。何暇出兵救魏。而趙時爲秦之細。自守不足。又何敢出一旅爲魏抗秦。此之不實。了然可知。

魏冉免相。

案。此在二十一年。傳所謂六歲而免也。說已見前。非二十四年免。

與韓王會新城。與魏王會新明邑。

案。此紀前二年。廿三年書與魏會宜陽。韓會新城。而年表及魏、韓世家竝作會西周。今二十五年紀書與

韓會新城。而韓表、韓世家言會兩周間。夫曰西周。曰兩周間。卽指河南之宜陽、新城也。而新明邑獨無攷。年表、世家俱不及。

二十六年。赦罪人遷之。

案。但言遷罪人。不知遷于何地。評林謂遷于新明邑。亦臆說無據。蓋明年赦罪人遷之南陽。史誤重也。古史無此五字。

取鄢、鄧。

案。此二十八年。楚爲秦所取者。鄢、鄧、西陵三城。紀失書西陵。表失書鄧。楚世家失書鄢、鄧。而白起傳言

拔鄆、鄧五城。乃拔鄆、鄧、西陵三城之誤。攷漢志鄧屬南陽。與昭王十六年取魏鄧別。魏之鄧城在河內地近軹也。

王與楚王會襄陵。

案。是年秦攻楚。取鄆。燒其先王墓。夷陵。楚襄王兵散。遁保于陳。安得楚與秦爲好會乎。必非二十九年事也。

蜀守若伐取巫郡及江南爲黔中郡。

案。史詮謂若伐楚。今本缺楚字是也。但白起及春申君傳言起取之。非蜀守張若。豈伐巫之役。起與若共之歟。華陽志是張若也。

三十二年。相穰侯攻魏。至大梁。破暴鳶。斬首四萬。鳶走。魏入三縣。請和。三十三年。客卿胡傷攻魏卷、蔡陽、長社。取之。擊芒卯。華陽破之。斬首十五萬。魏入南陽以和。

案。此所書戰最誤。卽年表世家列傳亦誤。攷秦昭三十二年。當魏安釐二年。韓釐廿一年。秦攻魏。拔兩城。軍大梁下。韓使暴鳶救魏。爲秦所敗。鳶走。開封。魏予秦溫以和。是秦昭三十二年之戰也。而此云魏入三縣。穰侯傳云割八縣。竝誤。蓋二縣秦拔之一縣。魏予之。共止三縣耳。明年。魏背秦。與齊從親。秦使穰侯復伐魏。拔四城。斬首四萬。是秦昭三十三年之戰也。而此以斬首四萬。并入大梁之役。書于三十二年。誤已。秦昭三十四年。趙魏攻韓華陽。韓告急于秦。穰侯又與白起。客卿胡陽攻趙。魏以救韓。走魏。

將芒卯斬十三萬人。敗趙將賈偃。沈其卒二萬人于河。取魏卷、蔡陽、長社。取趙觀津。魏子秦南陽以和。秦且與趙觀津。益趙以兵伐齊。是秦昭三十四年之戰也。而此在三十二年。誤一。止言客卿胡陽。反遣卻主帥穰侯。大將白起。較之年表。趙世家。白起及春申傳。但舉白起。更覺失倫。誤二。斬魏卒十三萬。沈趙卒二萬。乃合趙于魏。作十五萬人。與六國表。魏世家。俱非。穰侯傳云十萬。亦非。蓋脫五字。誤三。趙、魏同破。何以單說魏。而不及趙。表亦單說魏。又云得三晉將。魏世家云。秦破我及韓、趙。穰侯傳云。攻趙、韓、魏。白起傳云。得三晉將。春申傳云。攻韓、魏。述一事而各異如此。誤四。至暴鳶。國策。暴作舉。其字譌也。韓世家。鳶作鷩。其字同也。芒卯。西周策及韓子。說林。顯學。淮南。汜論。作孟卯。音之轉也。而韓子外儲說左作昭卯。呂覽。應言作孟卯。皆誤。又此紀胡傷兩見。當是傳寫之譌。依穰侯傳作陽。爲是。趙策作胡易。卽古陽字。

三十五年。佐韓、魏。楚伐燕。

案。秦無佐伐燕之事。而伐燕是齊、韓、魏。非韓、魏、楚。此與燕世家同誤。說在六國表中。

三十六年。客卿竈攻齊。取剛壽。

案。年表及田完世家。皆云三十七年。此與穰侯傳竝誤。在前一年。竈。秦策作造。音相近。龜策傳注。徐廣

曰。造音竈。

四十一年。夏。攻魏。取邢丘。懷。

案六國表魏世家秦取魏懷在昭王三十九年魏安釐九年。在取邢丘二年前。故范雎傳云使五大夫綰伐魏拔懷。後二歲拔邢丘也。此誤并在四十一年內。而邢丘當依魏世家作鄆丘。此與范雎傳作邢丘同誤。表作廩丘尤誤。廩丘乃齊地。時屬于趙。鄆丘爲汝南郡新鄆縣。春秋時屬齊。六國時屬魏。漢志應劭注云秦伐魏取鄆丘。可爲確據矣。若邢丘之地久入于秦。不待是時始取。故魏襄王時蘇秦說魏。歷數魏地不及邢丘。而魏世家安釐王十一年。信陵君謂魏王曰。秦固有懷茅邢丘也。則非是時始取可知。是時卽安釐十一年國策吳注謂廩丘鄆丘卽邢丘。謬甚。裴駟引韓詩外傳謂武王伐紂至其地更名邢丘。曰懷誕不足信。

十月宣太后薨。

案十月乃七月之誤。下文書九月可見。大事記及尙書疏證六反據此以爲秦未并天下已改用十月爲歲首。恐未然。

武安君白起攻韓拔九城。

案韓世家云秦拔我陘。句城汾旁。范雎傳云秦攻韓汾陘拔之。因城河上廣武。則知秦所拔祇陘城耳。陘在汾陽。遂城汾旁一帶至廣武。其曰河上者卽廣武澗。水經注所謂夾城之間有絕澗斷山是也。六國表云秦拔我城汾旁。我下缺陘字。白起傳云攻韓陘城拔五城。五城二字誤。當云拔之。此紀云九城尤誤。當云拔陘城。

四十四年攻韓南郡取之。

案年表及白起傳作南陽甚。是獨此稱南郡。謬爾。南郡乃楚地。秦昭廿九年攻楚取郢為南郡。韓安得有之。蓋南陽是總統之名。韓魏分有其地。魏之南陽是河內脩武等處。已于秦昭三十四年盡入于秦。韓之南陽是荊州宛穰等處。其地大半為秦所取。故秦于前十年置南陽郡矣。此後所攻者皆韓之南陽。不過取而附益之。至始皇十六年而韓南陽之地全納于秦。韓表及世家不書取南陽。但云秦擊我太行。蓋互見之。白起傳所謂攻南陽太行道絕之也。

葉陽悝出之國未至而死。

案一本葉陽下有君字。而葉陽集解謂一云華陽。蓋華陽君是也。華形近葉。故傳寫致譌。范睢傳華陽

徐廣曰一作葉。趙策諒毅對秦王有母弟葉陽之語。竝誤。非母弟也。尤誤。華陽君乃昭王舅。聶戎。又號新城君。悝乃

昭王母弟高陵君。此紀有脫誤。不然將以聶戎為公子悝矣。攷穰侯華陽高陵涇陽時稱為四貴。皆于

昭王四十二年同出就國。紀既脫缺。復誤書于四十五年。爾當移在上文。穰侯出之陶旬下。而補之曰

華陽君高陵君涇陽君出之國。高陵君悝未至而死。大事記謂昭王獨瀆其罪。故悝于四貴之中就封在後。亦非。

四十七年秦攻韓上黨上黨降趙。

案事在四十五年。趙世家白起傳可證。此因說長平事而并書于四十七年。非也。

大破趙于長平四十餘萬盡殺之。

案秦尙首功。斬一首賜爵一級。豈容混書。此餘字當作五。十月韓獻垣雍。

案十月二字衍。白起傳亦誤出也。下文于是年書正月。時秦尙未以十月爲歲首。不應先書十月。王齕將伐趙武安皮牢拔之。

案白起傳言齕攻拔皮牢不言武安是也。蓋前二十年秦封白起爲武安君。則其地久已屬秦。何待此時始拔乎。二字宜衍。秦策有武安語。史仍其誤耳。

張唐攻鄭拔之。

附案此以所拔之鄭爲舊鄭歟。則卽咸林之地。東遷時已屬秦也。以爲新鄭歟。則韓徙都于其地。不聞是時韓失國都也。疑是鄭字之譌。趙地也。

晉楚流死河二萬人。

附案徐廣云楚一作走。正義云此時無楚軍。走字是也。因有斯注。古史遂從之作晉軍走。而不知其謬。爾改楚作走。則流死之文不可接。謂時無楚軍。尤爲囁語。蓋卽楚救邯鄲之兵。始緣秦伐趙邯鄲而救。趙繼緣秦伐魏寧新中而救魏。楚世家稱救趙至新中可證已。死字當讀爲尸。古字通用。呂覽離謂篇。鄭富人溺者人得其死。漢書酷吏傳安得求子死。魯世家以其屍與之。索隱曰屍亦作死字。言趙楚軍敗流尸于河。有二萬人。此河必是汾河。寧新中是魏邑。非趙邑。秦不能拔邯鄲。移兵攻魏。楚與趙復。

救魏秦拔魏寧新中而去。故此晉字指趙。攻趙取二十餘縣。首虜九萬。

案此事非實說在趙世家。

五十六年秋。昭襄王卒。子孝文王立。史失書名。案隱謂名柱。廣宏明集引年紀名式。蓋有二名。孝文王元年。赦罪人。脩先王功臣。褒厚

親戚。弛苑囿。孝文王除喪。十月己亥即位。三日辛丑卒。子莊襄王立。名子楚。此失書。

附案。孝文之立。書之重言之。復讀史者或疑爲羨文錯簡。宜衍去赦罪人十五字。謂赦罪人等事皆莊襄元年事。增出于孝文元年之下。而孝文王除喪十月己亥。二語當互易之。移于孝文王元年之上。蓋既葬而除喪。其時不獨三年之喪久廢。卽期年亦不行耳。茲說未知然否。但余攷古者天子崩。太子卽位。其別有四。始死則正嗣子之位。尙書顧命。逆子釗于南門之外。延入翼室。是也。既殯則正繼體之位。顧命。王麻冕黼裳。入卽位。是也。踰年正改元之位。春秋書公卽位。是也。三年正踐祚之位。舜格于文祖。及成王免喪。將卽政。朝于廟。是也。則此所謂子孝文王立者。正嗣子之位也。昭襄卒于庚戌秋。喪葬之事。皆畢斯數月中。紀不言既殯。正繼體之禮。秦省之而不行也。所謂孝文王元年者。正改元之位也。所謂孝文王除喪十月己亥卽位者。正踐祚之位也。是年歲在辛亥。三年之喪廢。故孝文期年便除。而因以知昭王之卒。必在秋九月。竊意史公緣孝文卽位三日便卒。恐後世疑莫能明。特備載當日行事。至今秩然可見。不得以爲羨文錯簡矣。乃閻氏摘十月己亥一句。謂孝文已踰二年。以史稱享國一年爲

誤。莊襄以先君崩年改元，失禮莫大。見尙書疏證卷六上。其辨甚新，殊不知爾時秦尙未以十月爲歲首也。

韓獻成臯鞏。

案表及韓世家皆言秦拔取韓成臯、滎陽。此云韓獻之非也。又鞏亦滎陽之誤。鞏爲東周所居，韓安得有之。水經注廿三卷引史記秦莊襄王元年蒙鶩取成臯、滎陽，初置三川郡。酈公所引乃六國表。史豈因是年秦滅東周兼得鞏地而混言之邪。

二年使蒙鶩攻趙定太原。

案使蒙鶩八字乃羨文。年表及趙世家、蒙恬傳皆無其事。蓋所謂攻趙者，因是年有蒙鶩攻趙取三十城之事也。所謂定太原者，因明年有置太原郡之事也。二事下文皆書之，則此爲錯出無疑。況前十二年爲昭王四十八年，得韓上黨地，已北定太原矣。此時何煩再定乎。

三年蒙鶩攻魏高都、汲。

案三年二字亦羨文。所書之事表在二年，是已。汲字當依徐廣作波。蓋秦拔魏汲在始皇七年也。波與汲皆屬河內。

四年王齧攻上黨。

案莊襄無四年，此乃三年之誤。然前此昭王四十八年盡有韓上黨地，北定太原，是時何煩再攻。疑前所定者，惟降趙之城市邑十七。今所攻者，并其餘城而攻拔之。故韓世家云：秦悉拔我上黨也。紀表但

言攻上黨。擊上黨。拔上黨。似乎複出。而不知是悉拔之。紀表似欠明。正義謂上黨又反。故攻之。乃臆測之詞。非事實矣。

子政立。

附案。始皇以正月生。遂以正名之。惟其名正。是以改正月爲端月。始皇紀集解曰。徐廣云。一作正。宋忠云。以正月旦生。故名正。正義曰。正音政。周正建子之正也。則知史記古本是正字。不知何時盡改作政。凡本紀世家列傳中所稱始皇之名。竟無一作正者。可怪已。惟高誘呂氏春秋序作正字。孔仲達毛詩序作秦正。公羊哀十四年疏云。始皇名正。穀梁序疏云。秦正起而書記亡。庶幾不誤。然其誤自世本來。索隱引世本作政。蓋二字元屬通用。秦時諱正。或并避政字。故呂覽察微篇引左傳宣二年羊斟語。改子爲政。我爲政。作制字。後遂相沿以政爲名。流俗傳寫。便改史記之正爲政爾。容齋三筆謂始皇名政。自殊謬。秦未嘗以正月爲一月也。宋張世南游宦紀聞云。秦改正月爲征音。至今從之。此何理邪。示兒編云。始皇名政。避諱。讀正月爲征月。傳至于今。當如本字讀。始有分別。陸德明。唐大儒也。自秦至唐亦遠矣。當作釋文時。何不單出一音。以正舛誤。豈容詔後學以疑貳哉。釋文。正月音政。又音征也。前賢有辨正月之不當讀征者。從未有辨始皇之名正不名政者。然古正字自有征音。非沿秦諱。釋文不誤。觀詩猗嗟。雲漢。節南山諸章可見。

秦王政立二十六年。初并天下爲三十六郡。

案史言始皇伐滅諸侯并一天下以爲郡縣其實不盡然蓋仍秦人夸詡之詞耳攷衛至二世元年始絕楚苗裔有漢王越諸族子或爲王或爲君至閩君搖及無諸佐漢平秦是諸侯未盡滅天下未盡并也郡縣之名見于逸周書作雒解屢稱于左傳管子乘馬數篇亦有則非至秦時始設也昭廿九年左傳蔡墨言劉累

遷魯縣夏時恐未有縣之名

即三十六郡亦不全爲始皇所置據匈奴傳魏置河西上郡燕置上谷漁陽右北平遼

西遼東郡趙置雲中雁門代郡又世家韓有上黨守馮亭則上黨郡是韓置漢地理志概稱秦置者漢

承秦制故不言魏韓燕趙而巴蜀漢中上郡置于惠文王河東南陽黔中上黨南郡置于昭襄王三川

太原置于莊襄王俱見本紀不得全屬始皇初置也但三十六郡之目史不詳載秦變封建爲郡縣乃

一大事豈可缺略不書此史公疏處攷始皇置閩中南海桂林象郡皆在後不在三十六郡內則所謂

三十六郡者據漢志一曰河東二曰太原三曰上黨四曰三川五曰東郡六曰潁川七曰南陽八曰南

郡九曰九江十曰泗水十一曰鉅鹿十二曰齊郡十三曰琅邪十四曰會稽十五曰漢中十六曰蜀郡

十七曰巴郡十八曰隴西十九曰北地二十曰上郡二十一曰九原二十二曰雲中二十三曰雁門二

十四曰代郡二十五曰上谷二十六曰漁陽二十七曰右北平二十八曰遼西二十九曰遼東三十曰

邯鄲三十一曰碭郡三十二曰薛郡三十三曰長沙尙缺三郡以續郡國志校之則秦有鄆郡黔中郡

夫前志無黔中誠爲脫漏足以補郡數之缺而鄆非秦郡劉敞辨之甚悉見漢地志丹陽郡下是尙缺二郡也因

有以鄆郡充其數者本于應劭劭曰東海秦鄆郡而鄆非秦郡劉敞又辨之見高紀六年更有以楚郡充其數者本

于楚世家而秦無楚郡集解已糾其誤。胡三省通鑑注曾辨之。說在楚世家烏得妄稱爲秦郡哉。然則所缺

之二郡何在。曰。內史自當在三十六之內。始皇紀集解明言郡凡三十五。與內史爲三十六。蓋準諸侯

王表例也。史。漢諸侯王表。與京師內史凡十五郡。以漢準秦。則內史在內矣。漢志云。本秦京師爲內史。分天下作三十六郡。別而言之。非也。晉書地理志以及王應麟通鑑

地理通釋。胡氏通鑑注竝仍表說。固可以爲據矣。惟以鄆爲秦郡。乃屬續志之誤。其所缺一郡。余以水經注補之。水經

卷十三廣陽薊縣注云。秦始皇滅燕。以爲廣陽郡。漢高帝封盧綰爲燕國。于是三十六郡之數始備。而

自孟堅以來。均失去廣陽一郡。真不可解。秦武公十年。伐邠冀戎。初縣之。此史言立縣之始。

始皇帝五十一年而崩。

案史例但書在位之年。而其生年從略。獨始皇略其在位年數。反以生年書之。未知史公何意。又始皇

年十三而立。以踰年改元計之。在位三十七年。當是五十。始皇紀徐廣注云。年五十。安得五十一年乎。

子嬰立月餘。諸侯誅之。

案廣宏明集引陶公年紀云。殤帝子嬰四十六日。秦本無諡。又誰爲子嬰作諡。豈漢追稱之邪。觀高帝

不殺子嬰。祇以屬吏。而復予秦始皇守冢二十家。則憐嬰而加以帝號。義或然歟。越絕書外傳記地言。嬰立六月。妄也。

以國爲姓。

案史公混姓氏爲一。故凡氏皆謂之姓。而夏殷秦三紀之論。竝誤云以國爲姓。其實氏也。然其所載諸

氏。亦不盡以國。如殷之目夷。秦之飛廉。是以名爲氏者。終黎。鐘離同。菟裘。以邑爲氏者。國云乎哉。

郟氏、莒氏。

案左傳昭十七年。郟子稱少昊爲祖。杜注云。少昊金天氏。己姓之祖。又文七年傳。穆伯娶于莒。曰戴己。生文伯。其娣聲已。生惠叔。世本云。莒己姓。鄭語。莒。曹姓異。則郟、莒皆己姓。而史公以爲是嬴姓。未知何據。然秦以其先造父封趙城爲趙氏。

案此紀前云。非子蒙趙城姓趙氏。始皇紀云。姓趙氏。此論又云。秦爲趙氏。夫後人追溯所出。秦趙可以互稱。說見前。若專言其姓氏。豈容混冒妄載。通志曰。凡諸侯無氏。以國爵爲氏。秦自非子得邑。則以秦邑爲氏。及襄公得國。則以秦國爲氏。相傳至于始皇。若趙氏者。自造父獲封趙城爲趙氏。其後微弱而邑于晉。則以趙邑爲氏。及三分晉國。則以趙國爲氏。豈有秦國之君。而以趙國爲氏乎。

史記志疑卷五

始皇本紀第六

見呂不韋姬。

案姬者周姓。古時男子稱氏。婦人稱姓。齊姜。宋子。亦猶然也。姬是貴盛之族。故後世以爲婦人美稱。說

詩陳風疏

得通言之。已屬假借。不知何時又稱妾爲姬。其誤蓋始于周末。史公亦隨俗書之。事之流傳失

實。往往若是。宋葛立方韻語陽秋及宋葉夢得石林燕語與避暑錄話嘗論及焉。至宋徽宗改稱公主爲帝姬。見宋史本紀。尤屬笑柄。

名爲政姓趙氏。

案秦不當氏趙。政當作正。並說在秦紀。

年十三歲。

案周禮太史職注。中數曰歲。朔數曰年。月令疏解之甚明。然此是歲年相對。故有中數朔數之別。若散而言之。歲亦年也。爾雅夏曰歲。周曰年。是已。古無年歲並稱者。曰知錄三十二云。天之行謂之歲。人之行謂之年。古人但曰年幾何。不言歲也。自太史公始變之。

莊襄王死。

案此獨變言死何以貶也當書曰卒越宛有郢置南郡矣

附案此總敘秦所置郡獨無南陽黔中蓋越卽黔中宛卽南陽而南郡則取楚郢所置文法錯綜或疑有缺文非也

王齕

附案徐云一作齕是也秦紀白起傳並作齕此兩書皆作齕誤年表旣作齕又作齕亦誤

二年廙公將卒攻卷

案秦昭三十四年已取魏卷何煩此時攻之疑卷字誤

十月庚寅蝗蟲從東方來

附案表作七月是也史詮曰今本七作十誤

將軍驚攻魏定酸棗燕虛長平雍丘山陽城皆拔之取二十城

案春申君傳上秦昭王書有拔燕虛酸棗之語則此三城已于前三十餘年取之矣或者是時因拔長平雍丘山陽而復定三城之疆界歟至表言取酸棗二十城則脫不全載當衍酸棗二字

韓魏趙衛楚共擊秦取壽陵秦出兵五國兵罷

翟教授灝曰擊秦之役年表但言五國共擊秦楚世家但言與諸侯共伐秦不利而去惟趙世家云龐

媛將趙、楚、魏、燕之銳師攻秦，秦不拔也。處俱略不書，以余論之，衛微弱僅存，被秦迫逐，徙居野王，將救亡不暇，何敢攻秦？蓋燕、楚、趙、魏五國伐秦耳。此紀誤以衛替燕，而趙世家誤脫韓也。至取壽陵之說，更非，無論不勝而罷，未嘗取秦寸土，而五國所攻者，乃新豐之秦，非壽陵也。考壽陵是趙地，不知何時屬秦。正義云：壽陵本趙邑，呂子首時篇云：邯鄲以壽陵困于萬民，而衛取蒯氏。高誘注：壽陵，魏邑。趙兼有之。莊子秋水有壽陵餘子學步邯鄲之語。趙世家：肅侯十五年，起壽陵，蓋因陵以名地。秦孝文王葬壽陵，卽此。通鑑注云：徐廣曰：壽陵在常山。據五國攻秦取壽陵，至函谷，則壽陵不在新安、宜陽之間。當在河東郡界，常山無乃太遠。胡氏誤信取壽陵之言，故有此注。

拔衛迫東郡，其君角率其支屬徙居野王，阻其山以保魏之河內。案：是時爲衛元君，非角也。此誤書角。河內之地，秦未全有，故曰魏之河內。詳在穰侯傳中。

夏太后死。

案：言死非也，當依表作薨。

八年，王弟長安君成驕將軍擊趙，反死屯留，軍吏皆斬死，遷其民于臨洮。將軍壁死，卒屯留蒲鶮反，戮其屍。徐廣曰：鶮，一作鶮。案：隱曰：古鶮字。

案：此節文義最難解。注亦欠明。趙太常曰：蒲鶮恐是反者姓名，乃屯留之卒，從成驕而反，雖死猶戮其屍也。將軍壁死，是承上文死屯留句，言其死狀，而卒屯留九字，又就軍吏皆斬死句抽出言之。錢宮詹

曰壁與蒲鶮似皆人名。壁即討成蟜之將軍。壁死而部卒又叛。因更戮其屍耳。錢唐陳太僕兆崙云。史文有錯簡。并有缺羨處。當云。王弟長安君成蟜為將軍。缺為字擊趙反。屯留。死字將軍壁死。軍吏皆斬。死字無死字也。漢五行志遷其民于臨洮。卒屯留。蒲鶮反。戮其屍。蓋蒲鶮是人性名。謂成蟜為將軍。擊趙至屯留而反。秦兵討之。成蟜戰死于壁壘之間。其所將軍吏及屯留之民。從將軍反者。皆斬之。遷之士卒。懼誅。有屯留人蒲鶮者。與衆復反。罪坐主帥。故戮成蟜之屍也。王孝廉云。當作玉弟長安君成蟜。將軍蒲鶮擊趙反。死屯留。戮其屍。軍吏皆斬。遷其民于臨洮。蓋死字將軍字。死屯留字。反字皆復出。而又衍壁字。卒字。蒲鶮及戮其屍五字。乃錯倒也。四解未知孰勝。

攻魏垣、蒲陽

案六國表。魏世家作垣。蒲陽。衍三城。此脫書衍。然考秦昭十八年取魏垣。是河東之垣也。而春申傳上昭王書。又有并蒲衍。首垣之語。是開封之長垣也。則垣有兩地。已與衍俱為昭王所拔。奚待始皇九年復攻。此與年表。世家同誤。或問。秦惠文十年降蒲陽。本紀雖不書。而年表及魏世家書之。即春申亦以蒲與衍。垣並言。子何不以為誤邪。曰。惠文降蒲陽。仍即與魏。紀表世家皆不載。獨見于張儀傳中。故此時攻之。若春申之所謂蒲。乃長垣之蒲鄉。非蒲陽也。蓋此時但當言攻魏蒲陽耳。垣與衍皆屬羨文。

上宿雍

案裴駘謂司馬遷言上。是尊尊之意。殊非。上者見在之稱。或以稱本朝。尚可。若此乃誤。仍秦史舊文。劉

知幾所謂事有質遷。言無變革也。此與呂不韋傳論稱上之雍郊。燕世家稱今王喜同誤。蓋史書之中。多有仍舊文而未及刪易者。故史通因習篇曰。史記陳涉世家。稱其子孫至今血食。漢書涉傳。具載遷文。遷之言。今實孝武之世也。固之言。今當孝明之世也。事出百年。語同一理。豈陳氏苗裔。祚流東京者乎。漢書嚴君平既卒。蜀人至今稱之。皇甫謐全錄斯語。載于高士傳。孟堅。士安年代懸隔。至今之說。豈可同云。日知錄二十六曰。魏書孝靜帝紀。稱太原公今上。舊唐書唐臨傳。今上字再見。徐有功傳。澤王上金傳。今上字各一見。皆謂玄宗。唐藝文志張說。僉今上實錄。劉昫必仍張說元文。韋貫之傳。上卽位。謂穆宗。並舊史之文。作書者。失于改削耳。綜覽後先。誤端一例。安得以爲意在尊尊邪。

王冠。

案。始皇年十三而立。則當于七年冠。此書于九年。是二十二矣。疑誤。或曰。秦紀于惠文。昭襄兩王皆于二十二歲冠。蓋秦變禮也。

四月寒凍有死者。

案。上文已書四月。則此爲重出矣。豈因寒不以時。重書以見異邪。史詮云。當更曰是月。坐嫪毒免。

附案。湖本譌刻嫪作繆。

齊人茅焦說秦王。

案茅焦事詳說苑正諫篇評林引明董份曰不先記秦政逐太后而遽述茅焦恐太簡通鑑載茅焦事在九年閻氏若邪潛丘

劄記卷五與石金齋書曾論之

秦王乃迎太后于雍而入咸陽復居甘泉宮

案此紀及三輔黃圖皆言始皇二十七年作甘泉宮則是時為始皇十年安得有之況甘泉宮在左馮

翊池陽縣西正義引括地志云在雲陽與黃圖異

與史言迎太后入咸陽亦不合徐廣引表云咸陽南宮是也而表無南

宮之文蓋傳寫脫耳然南宮未知的為何宮考漢志右扶風渭城縣注有蘭池宮渭城即咸陽豈即南宮歟

程大昌雍錄直謂南宮為甘泉宮謬甚據說苑是時太后從械陽宮歸咸陽說苑一本作賁陽非竊意

咸陽南宮必在蘭池南乃太后之宮若漢稱太后宮為東宮矣

王翦桓齮楊端和攻鄴取九城王翦攻闕與櫟陽皆并為一軍翦將十八日軍歸斗食以下什推二人從

軍取鄴安陽桓齮將

案此所敘攻取之事錯雜不明蓋是役也王翦為主將桓齮為次將楊端和為末將并軍伐趙攻鄴未

得先取九城王翦遂別攻闕與櫟陽而留桓齮攻鄴齮既取鄴翦復令齮攻櫟陽已獨攻闕與皆取之

故又言取鄴櫟陽桓齮將也安陽當作櫟陽必傳寫之誤安陽即魏寧新中無論本非趙地且前廿餘

年已為昭王拔之矣再考王翦傳但言破闕與拔九城而不及鄴櫟陽足見取鄴櫟陽是齮而非翦政

與紀合年表于趙書曰秦拔我闕與鄴取九城而失書拔櫟陽于秦表書曰王翦擊鄴闕與取九城止

就前半事言之而亦失書取鄴、櫟陽。至燕世家稱拔鄴九城。趙世家僅稱拔鄴。則更屬疏脫。桓齮攻趙平陽。殺趙將扈輒。

附案。水經注十云。漳水又東北逕武隧縣故城南。史記。秦破趙將扈輒于武隧。卽此處。王莽更名桓隴矣。酈公蓋引李牧傳文。而不知牧傳言武遂城是誤耳。河間之武遂。分屬韓、燕。屬燕者爲李牧所拔。屬韓者爲秦所取。趙安得有武遂乎。若卽指李牧所拔之燕武遂。而秦實未嘗攻趙新有之武遂也。考趙世家。秦攻武城。扈輒率師救之。軍敗死焉。據此。則牧傳言武遂城。乃誤多一遂字。而紀表之言平陽。乃互見之詞。故明年定平陽。武城。蓋秦攻得武城。而兼得平陽也。此平陽在魏郡鄴縣。續志可據。正義引括地志。謂在相州臨漳縣西。亦同。非韓都河東之平陽也。

攻趙軍于平陽。取宜安。破之。殺其將軍桓齮。定平陽。武城。

案。趙世家。秦攻赤麗。宜安。李牧與戰。肥下。卻之。李牧傳。趙以牧爲大將軍。擊秦軍于宜安。大破秦軍。走秦將桓齮。則秦爲趙所破。安有取地殺將之事。此秦史誕詞。史公未之改爾。赤麗。宜安。攻而未拔。則桓齮所定者。只前年攻得之平陽。武城而已。紀表不言攻赤麗。略之也。秦表云。桓齮定平陽。武城。宜安。趙表云。秦拔我宜安。並誤仍秦史。故彼此牴牾。多不齊一。秦表當衍宜安二字。趙表當改拔爲攻字。

取狼孟。

案。表亦言取狼孟。番吾。考狼孟已于莊襄二年取之。何待始皇十五年大兵攻取乎。而趙世家及李牧

傳並稱牧破秦軍于番吾。則表言取番吾亦妄。蓋又仍秦史而誤者也。

發卒受地韓南陽假守騰。

附案。此句疑有譌脫。方氏補正曰。發卒受韓南陽地。而使內史騰爲假守也。

華陽太后卒。

案。表書薨。是此書卒。非。

大興兵攻趙。王翦將上地下井陘。端和將河內。羌瘃伐趙。端和圍邯鄲城。

附案。此必有錯簡缺文。蓋三將攻趙。王翦將上地下井陘。楊端和將河內。圍邯鄲城。羌瘃獨缺。只存伐

趙二字。而錯出于端和將河內句下也。圍邯鄲城上又重出端和二字。

始皇帝母太后崩。

案。此當書曰。秦王母太后薨。是時秦未稱帝。又紀文前後皆稱秦王。不應忽云始皇帝。表作帝太后。亦

非。夏太后。華陽太后。皆太后之姑也。紀于夏太后書死。華陽太后書卒。而于太后書崩。體例殊乖。豈秦

史如是書乎。

王賁攻薊。

附案。年表及王翦傳。王賁擊楚。此言攻薊。明是荆字之譌。時賁父翦方定燕薊也。通鑑作李信伐楚。又

誤合二事爲一矣。此年秦兩攻荆。王賁之攻。在翦擊燕。薊未歸之前。李信之攻。在翦定燕。薊已還之後。

不可混也。

二十三年。秦王復召王翦。彊起之。使將擊荆。取陳以南。至平輿。虜荆王。秦王游至郢陳。荆將項燕立昌平君爲荆王。反秦于淮南。二十四年。王翦蒙武攻荆。破荆軍。昌平君死。項燕遂自殺。

案六國表。楚世家。蒙恬傳皆言始皇二十三年殺項燕。二十四年虜楚王負芻。王翦傳亦以虜楚王在殺項燕之後。獨此言二十三年虜荆王。二十四年項燕自殺。而又有項燕立昌平君一節。余詳考之。實此紀誤也。昌平君雖楚之公子。而久居于秦。嘗爲秦相國。定嫪毐之亂。其時徙居郢。項燕安所得而立之。負芻竄處壽春。未曾親歷戎行。何遽被虜。而項燕爲楚名將。燕不死。楚不滅。誰謂項燕後楚死乎。項羽紀。六國表。王翦蒙恬傳俱說項燕是王翦殺之。索隱引楚漢春秋同。惟此以爲自殺。亦屬牴牾。竊意王翦擊破楚軍。殺項燕。時昌平君在郢。楚之諸將必有敗逃于郢者。昌平君知項燕已死。楚淮北之地盡失。難以圖存。藉舊將之依附。僭立爲王。以成犄角之勢。適秦王游至郢陳。謀欲襲之。遂反江南。而王翦等已破楚虜負芻。計不果行。昌平君自殺。斯固情事之明白可料者。寧有如紀所載邪。然則宜何以書曰。虜荆王三字。自在破荆軍之下。平輿之下。元有殺項燕三字。今混入項燕于立昌平君之上。又脫一殺字。而昌平君遂自殺。句中有死項燕三字。乃羨文也。淮南爲江南之誤。徐廣云。淮一作江。是已。當云。二十三年。秦王復召王翦。彊起之。使將擊荆。取陳以南。至平輿。殺項燕。秦王游至郢陳。荆將立昌平君爲荆王。反秦于江南。二十四年。王翦蒙武攻荆。破荆軍。虜荆王。昌平君遂自殺。

收天下兵聚之咸陽銷以為鍾鑪金人十二重各千石。

案漢五行志引史記云有大人長五丈足履六尺皆夷狄服凡十二人見于臨洮此紀無之不著臨洮

大人之事則莫識鑄金人何故又正義引三輔舊事云銅人各重二十四萬斤水經注而此言千石考

黃圖云鍾鑪高三丈鍾小者皆千石則知千石者乃鍾鑪重數史誤并之而又失書金人之重耳。

南至北嚮戶。

案北戶是地名見爾雅此下琅琊頌亦有南盡北戶之語嚮字衍余聞之盧學士云。

上鄒嶧山立石。

案始皇刻石之詞凡七史載其六鄒嶧乃首事獨刪而不錄未識史公何意今其詞尚存也宋趙明誠

金石錄云嶧山碑文詞簡古非秦人不能為史記獨遺此文何哉又茅山北良常山有始皇題壁李斯書文

錦素壁見陶宏景真誥神樞第一篇

二十有六年。

附案容齋隨筆據石刻拓本謂諸銘每稱年皆當作卅字卅字太史公誤易之或後人傳寫之譌以諸

銘皆四字一句也然余讀之眾銘有三字句有五字句琅邪銘有五字六字句有七字九字句豈盡四

字為一句哉存考國語補音謂卅卅卅皆與于秦

親巡遠方黎民。

案始皇更名民曰黔首。故諸銘中皆稱黔首。不應泰山刻石忽言黎民。且銘皆四言。亦不應此獨六字爲句。疑有誤。金石錄謂劉跋至泰山見其碑。模之。乃作親輻遠黎。未知信否。輻卽巡之異文。廣川書跋音鄰非。

建設長利。

附案。史詮謂吏誤作利。則長當音上聲。然正義云。長直良反。則應如字讀。兩說皆通。

昭隔內外。

附案。徐廣云。隔一作融。是也。

乃徙黔首三萬戶琅邪臺下。

案。水經注二十六。御覽百六十並作二萬戶。

列侯武城侯王離。列侯通武侯王賁。

案。離爲賁子。何以叙于上。

丞相隗林。

附案。顏之推家訓書證篇云。史記隗林。諸本皆作山林之林。開皇二年五月。長安民掘得秦時鐵稱權。旁有銅塗鐫銘曰。詔丞相狀縮。乃爲狀貌之狀。引旁作犬。則知俗作隗林。非也。當爲隗狀耳。索隱亦據顏說。以爲遠古之證。

齊人徐市等。

附案。市卽芾字。與黻同。各本皆譌刻爲朝市之市。說在淮南王傳。

上問博士因。湘君何神。博士對曰。聞之堯女舜之妻而葬此。

案。堯女舜妻之對。方士之妄談。爲博士者亦言之乎。蓋以始皇好神仙。希旨詭語。非實有其事也。然仍襲傳會。則自屈原九歌來。江自有神。何知姓名哉。路史又以湘神爲舜之二女。宵明。燭光。其誕政同。又此曰。上問博士。後文曰。上自南郡。曰。上許之。曰。上崩在外。曰。知上死。曰。上輜車。凡六上字。皆誤。仍秦史元文。說見前。

皇帝哀衆。

附案。盧學士曰。哀衆當是哀鰥之譌。鰥與矜古通用。漢書贊于定國。哀鰥。哲獄。亦卽謂哀矜也。

使燕人盧生。

案。說苑反質篇謂齊客盧生。而此稱燕人異。

求羨門高。

附案。封禪書羨門子高。此與郊祀志羨門高。是一仙人名。魏張揖漢書司馬相如傳注云。碣石山上仙人也。集解。正義連下誓字爲句。分羨門與高誓爲二人。大誤。

誓刻碣石門。壞城郭。決通隄防。其辭曰。

陳太僕曰。壞城郭二語橫插中間。與上下文義不貫。當爲羨文。卽碣石銘內墮壞城郭。決通川防之辭。而重出者。班彪譏子長刊落不盡。尙有盈詞。政是此類。小蘇作古史。便刪去矣。

遂興師旅。

德清沈端蒙曰。此上有缺文。

初一秦平。

評林曰。秦平疑是秦字。方叶韻。

請刻此石。

附案。丹鉛錄曰。請刻此石。古碑文作刻此樂石。後人不知樂石之義。乃妄改之。唐封演云。聞見樂石謂以泗濱浮磬作碑也。楊說殊非。顏師古匡謬正俗曰。嶧山文云。刻茲樂石。蓋嶧山近泗。故用磬石。他刻

文則無此語。據師古所言。安得碣石碑亦用樂石邪。

屬之陰山。

附案。水經注三引此作陶山。譌也。陶陰二字古多迷亂。說在惠景侯表中。

以爲三十四縣。

案。表作四十四。與匈奴傳同。徐廣云。是也。此誤四爲三。

取高闕。陶山。北假中。

附案。水經注河水三引此作據陽山。卽蒙恬、匈奴兩傳及續志五原郡注並同。則知今本譌陽山爲陶山。而又缺據字也。陽山在河北。

臣聞殷周之王千餘歲。

案。李斯傳亦載淳于越此語。商六百四十餘祀。周八百七十餘年。何言千餘歲乎。

若欲有學法令。以吏爲師。

附案。徐廣謂一無法令二字。是也。

乃營作朝宮。渭南上林苑中。先作前殿。阿房。東西五百步。南北五十丈。上可以坐萬人。下可以建五丈旗。案。此紀及漢賈山疏皆言阿房始皇作。獨三輔黃圖稱阿房亦曰阿城。惠文王造。未成而亡。始皇廣之。雍錄以爲不然。始皇明言咸陽人多宮小。乃渡渭南營作。則非荆始前人。其實始皇亦未竟功。二世復作之。而勝、廣已亂。其功未竟也。而阿房之制。所說多異。正義引三輔舊事云。東西三里。南北五百步。黃圖云。東西五十步。南北五十丈。水經注十九引關中記云。東西千步。南北三百步。庭中受十萬人。蓋規度恢宏。莫能究的。今以黃圖敘朝宮參之。則中可受十萬人者。乃言朝宮。關中記誤以爲阿房耳。若四至步數。則無從考定矣。

發北山石椁。

義門讀書記曰。椁字疑衍。

諸生傳相告引。乃自除犯禁者四百六十餘人。皆阬之咸陽。

案。尚書孔序疏及儒林傳正義引衛宏古文序云。秦既焚書。患天下不從。諸生至者拜爲郎。前後七百人。乃密令冬月種瓜于麗山。硎谷中。溫處瓜實成。使人上書曰。瓜冬有實。詔天下博士諸生說之。人人各異。則命就視之。而爲伏機。諸生方相論難不決。因發機從上。填之以土。皆壓終無聲。唐先號其地爲懲儒鄉。天寶中。爲旌儒廟。在新豐縣溫湯西南馬谷。而此紀稱阬之咸陽。夫咸陽渭北也。馬谷渭南也。豈馬谷中七百人自爲一戮。而咸陽四百六十餘人別爲一戮邪。文選四征賦注引史作四百六十四人。論衡言秦于麗山下坑儒士二百四十人。雍錄云。議瓜之說似太詭巧。始皇剛暴自是。其有違已非今者。直自阬之。不待設詭也。余嘗謂世以焚書阬儒爲始皇罪。實不盡然。天下之書雖燒。而博士官所職。與丞相府所藏。固未焚矣。始皇三十六年。使博士爲仙真人詩。叔孫通傳載二世召博士諸儒生三十餘人。問陳勝。又通降漢。從儒生弟子百餘人。徵魯諸生三十餘人。項羽紀稱魯爲其守禮義死節。則知秦時未嘗廢儒。亦未嘗聚天下之儒而盡阬之。其所阬者。大抵方伎之流。與諸生一時議論不合者耳。論衡語增篇亦以盡阬儒士絕滅詩書爲非實也。扶蘇曰。諸生皆誦法孔子。豈真識孔子之儒哉。而焚阬之禍。李斯爲之。斯與韓非並事荀卿。荀卿非古謗聖。敢爲異談。故非之言曰。世之愚學。多誦先古之書。以亂當世之治。斯之言曰。諸生不師今而學古。以非當世。惑亂黔首。同門相傳。俱承荀卿之教。而不自知其悖。東坡曾深論之。但商鞅當孝公時。已言民好學問。則怠于農戰。以國用詩書禮樂必削亡。謂之六蠹。若鞅者。詎非李

韓之嚆矢乎。宜其及也。韓子和氏篇言商君教孝公燔詩書而明法令。史無其事。或孝公未聽從歟。黔首或刻其石曰。始皇帝死而地分。

案述異記謂始皇三十六年童謠曰。阿房阿房亡始皇。或因有童謠而刻石乎。史不言之。略也。

使者從關東夜過華陰平舒道。有人持璧遮使者曰。爲吾遺瀆池君。因言曰。今年祖龍死。

附案漢五行志引史記云。鄭客從關東來。初學記引史作鄭容。至華陰望見素車白馬從華山上下。知其非人道。

住止而待之。遂至。持璧與客曰。爲我遺鎬池君。因言今年祖龍死。而晉干寶搜神記及水經注十九引

春秋後傳。後書藝文傳注及初學記引樂資春秋後傳同。

皆以鄭客爲鄭容。以遺璧爲致書。并有文石款梓之說。與史漢大異。真

鄭公所謂神道茫昧。理難辨測者也。張晏以瀆池君爲武士。雍錄引唐梁載言十道志以爲始皇。皆非。服虔曰。水神。是也。至今年當依搜神記作明

年爲確。各處並誤作今年。潛丘劄記論之云。今字必明字之譌。證有二焉。一果三十七年七月始皇崩

其言驗。一始皇曰。山鬼固不過知一歲事。譏其伎倆僅知今年。若明年之事。彼豈能預知乎。幸其言不

驗。李白古風云。璧遺鎬池君。明年祖龍死。秦人相謂曰。吾屬可去矣。一柱桃花源。千春隔流水。乃知太

白唐時所見史記本尙無譌也。余又得一證。文選潘岳西征賦注及初學記卷五引史記作明年。可補

閻氏所未及。

左丞相斯從。

襄城劉氏青芝史記紀疑曰。後陰謀乃趙高與李斯。此處宜並敍趙高名。自是史公疏筆。

望祀虞舜于九疑山。

案祀舜九疑仍葬于蒼梧之謬也。已說見五帝紀。

渡海渚。

案正義以海字爲江之誤。史證謂江渚一名牛渚。卽采石磯也。秦時地屬丹陽。

乃西百二十里從狹中渡。

附案。劉昭郡國志注于吳郡餘杭下引史作西北二十里。此百字譌。狹中爲赭、龜二山之海門。亦非餘杭也。詳見蕭山毛氏奇齡杭志三詰三誤辨。

上會稽祭大禹。

案此仍禹葬會稽之妄。說在夏紀。

追首高明。

附案。索隱正義據王劭案張徽所錄會稽碑異文。不盡可依信。惟此首字作道。小司馬謂雅符人情。當是也。有本作守者。非。

以立恆常。

案文帝名恆。史何以不諱。豈因恆常連文難避故邪。

飾省宣義。

附案。徐廣謂省一作非。評林明余有丁云。省或作省。與徐說字異義同。方氏補正又依字釋之曰。飾。整齊也。卽下防隔內外禁止淫泆也。省。考察也。卽察其爲寄緞逃嫁也。宣義者。示以殺之無罪子不得母之義也。未知孰是。

至榮成山

附案。榮字誤。正義云。卽山也。卽下各本脫成字。日知錄三十一云。南史。明僧紹隱于長廣郡之嶗山。本

草。天麻生嶗山。則字本作嶗。繁一作牢。或改。寰宇記。秦始皇登勞。盛山望蓬萊。勞盛二山名。盛卽成山。古

字通用。漢書敘記志作盛山。武帝紀及地理志注作成山。始皇紀正義曰。榮成山卽成山也。案。史書及前代地理書並無榮成山。

予向疑之後。見論衡引此作勞成山。見紀妖乃知昔人傳誤。唐時諸君亦未詳考。遂使勞山并盛之名。

成山冒榮之號。今特著之。以正史書二千年之誤。方輿紀要曰。勞山在山東萊州府卽墨縣東南六十

里。成山在文登縣東北百五十里。後書蓬萊傳。之琅邪。勞山。養志修道。

下銅而致棹

附案。徐廣云。銅。一作錮。是也。劉向說此事云。下錮三泉。

機相灌輸

附案。御覽八百十二引史曰。機轉相輸。終而復始。

雖萬世世不軼毀。今始皇爲極廟。

附案。盧學士曰。二句當互易之。觀後云。自襄公已下軼毀。則此句之爲誤倒明矣。于是二世乃遵用趙高。

附案。史詮曰。洞本遵作尊。

相立爲侯王。

案。此叙諸王之立。獨遺韓廣爲燕王。何也。

遂殺章曹陽。

案。陳涉世家。曹陽乃章邯復敗周章之地。非章死之地。章自剄死。非被殺也。

右丞相去疾。左丞相斯。將軍馮劫進諫。

案。李斯傳。諸侯叛秦。斯數欲請閒。二世不許而責問之。斯阿意求容。以督責之術對。而紀云去疾。斯。劫進諫。必紀誤也。斯既阿意求容。何能直諫。況請閒而二世不許。繼請而爲趙高所賣。斯實未嘗一言。或去疾。馮劫諫。而連斯之名于奏牘乎。又斯就五刑。因高之譖。而後文謂因諫被誅。亦紀之誤。二世責問斯語與傳異。此史公不及整頓處。未知孰實。

啜土形。

附案。李斯傳作劓。古形與刑通。而又旁省金字。遂作形耳。

謂鹿爲馬。

案良馬有似鹿者。價千金。見韓子外儲說右篇。淮南說山論衡講瑞篇述之。高蓋依以爲計也。但陸賈新語辨惑篇云。秦二世之時。趙高駕鹿而從行。王曰。丞相何爲駕鹿。高曰。馬也。與史言獻鹿謂馬異。李斯傳尙有召太卜一節。此從略耳。又高欲作亂。或以青爲黑。以黑爲黃。見鄭康成禮器注。又高束蒲爲脯。以惑二世。故後書文苑崔琦傳云。玄黃改色。馬鹿易形。唐張弧素履子履忠篇云。指鹿爲馬。以玄爲黃。潘岳西征賦云。野蒲變而成脯。苑鹿化以爲馬。唐書蘇安恆傳云。指馬獻蒲。先善善良。皆使趙高事。史祇言馬鹿一端。藝文類聚謂蒲脯事出史記。李善謂出風俗通也。韓子內儲說上篇云。子之言白馬。以驗左右之誠。高豈祖其奸智歟。

高因陰中諸言鹿者以法。

附案。漢書京房傳。秦時。趙高用事。有正先者。非刺高而死。高威自此成。故秦之亂。正先趣之。此事甚僻。可補史遺。孟康曰。姓正名先。秦博士也。但秦諱正。不知正先爾。時改姓云何。封禪書正伯僑。司馬相如傳。作征。或正先改從征。

二世乃齋于望夷宮。

案。此言二世因夢祀涇。故齋望夷。而李斯傳謂二世射殺人于上林。故高令出居望夷以禳之。兩處異詞。未知孰信。

使郎中令爲內應。

附案。徐廣謂一作郎中令趙成是也。各本皆缺。趙成乃趙高之弟。已見上文。

二世曰丞相可得見否。

案此言高謝病不朝。令其婿弟劫二世自殺。故不見高也。而李斯傳又言高親劫二世。岐出。

趙高乃悉召諸大臣公子。告以誅二世之狀。

案李斯傳言高自佩璽上殿。意圖篡位。因殿欲壞者三。高乃召子嬰立之。與紀亦異。當是謀篡後告大

臣公子而立嬰也。

我稱病不行。

案斯傳言嬰即位。稱疾不聽事。高謁病。因召入刺殺之。此言嬰稱病不廟見。高自往請。遂刺殺高于齋

宮。兩處未知孰是。拾遺記言子嬰囚高咸陽獄。懸于井中。七日不死。更以鑊煮。七日不沸。乃戮之。釋史

以為附會迂怪也。

善哉乎賈生推言之也。

附案。此所載過秦論與賈誼書字句多異。必史公略為裁換耳。但賈論上下二篇。今以下篇後段秦并

矣。置于上篇之前。以下篇前段秦并至。置于上篇之後。何其紊也。蓋史公取上篇為陳涉世家論。漢書

仍史。故止。取下篇為始皇紀論。後人妄以上篇增入此紀。而又傳寫倒亂。遂致次第失舊。且與世家重

複矣。故徐廣謂一本有下篇無上篇。而以秦并兼諸侯山東三十餘郡繼秦并海內末也。此本。索隱亦

云太史公刪過秦篇著此論當其義而省其詞褚先生增續既已混淆指世家而世俗小智不唯刪省之旨合寫本論于此不同也

鉏擾白梃

附案史詮曰擾字從木湖本作擾誤新書作擾亦非

章邯因以三軍之衆要市于外

索隱曰此評失也章邯之降由趙高用事不信任軍將一則恐誅二則楚兵既盛王離見虜遂以兵降耳非三軍要市于外以求封明矣

籍使子嬰有庸主之材僅得中佐山東雖亂秦之地可全而有宗廟之祀未當絕也

案班固典引序云此言非是又此紀所附班固文云秦之積衰天下士崩瓦解雖有周旦之材無所復陳其巧而以責一日之孤誤哉

至于秦王

案秦王當作始皇下文五秦王字同

安土息民

附案今本新書作安土而索隱引賈誼書安作案則當爲案士猶言案兵也安乃案之譌脫若士士二字古人通寫律書云兼列邦士周頌云保有厥士義並作士鄭注周禮校人職云世本相士作乘馬竹

書亦曰相士並宜作士。大司徒職歸于士。鄭司農云。或謂歸于園士。疏曰。司農之意。此經士或爲士。故解爲園士。呂氏春秋任地篇云。使吾士靖而剛浴。士高誘注。士當作土。至洪适隸釋。隸續所載碑碣。多以士爲土。以土爲士。不勝僂舉矣。

子嬰孤立無親。危弱無輔。三主惑而終身不悟。

評林明凌約言曰。稚隆既云孤立無親。危弱無輔。已重爲子嬰惜矣。又云。三主惑而終身不悟。毋乃責

之過乎。王鏊曰。過秦論極古。與先秦相上下。但大意如一。不甚變化。且詞有重裝者。意生偶作。未及刪

定耳。下文三主失道。亦非。

故周五序得其道。

附案。索隱謂賈誼書五作王。是也。今本新書亦譌作五。

于是秦人拱手而取西河之外。

案。秦惠文王八年。魏入河西地于秦。孝公時。安得至西河之外乎。商君傳有魏惠王割河西地獻秦以

和之語。並誤。

惠王、武王蒙故業。

附案。陳涉世家作惠文王、武王、昭王。新書及漢書作惠文、武、昭。襄文選作惠文、武、昭。此獨遺昭王一代。

收要害之郡。

案新書文選收上有北字是也此與世家及漢書缺

齊有孟嘗趙有平原楚有春申魏有信陵

附案四公子之封號前哲多不詳注而正義于春申傳云四君封邑檢皆不獲唯平原有地又非趙境

並蓋號諡索隱于魏公子傳云地理志無信陵或是鄉邑名兩注疏陋之甚魯頌箋曰嘗在薛之旁裴

駟司馬貞已引之田文襲父封薛而兼食嘗邑故號孟嘗孟乃其字猶稱薛文然也路史國名紀七云常

謬也趙勝封于東武城黃歇初封淮北後徙吳墟俱明載本傳而謂之平原春申者是號而非地故韓

子和氏篇言楚莊王有弟春申君漢朱建及孝景皇后母臧兒皆號平原君也正義以臧兒之

無忌則封于陳留郡之寧陵縣而號之為信陵君者也寧陵為古葛地水經注二十三卷汜水又東逕

葛城北故葛伯之國葛于六國屬魏魏以封公子無忌號信陵此乃確證

有寧越

附案寧字各處作甯古通用也呂子不廣篇有越說趙將孔青事注云趙中牟人又博志篇曰甯越中

牟之鄙人學十五歲而周威公師之注云威公西周君徐廣謂越一作經或自別有此人不必甯越非

也

徐尙

附案此所稱二十人徐尙翟景帶佗未詳

昭滑。

附案。涉世家作邵。國策、新書、漢書、文選並作召。則此作昭字譌也。甘茂傳亦作召滑。至徐廣謂滑一作涓。非。

叩關而攻秦。

附案。此與文選作叩。新書、漢書與涉世家作仰。師古注及索隱並言秦地形高。故云仰。今流俗本作叩。非也。

遂巡遁逃而不敢進。

附案。世家、文選無遂巡字。新書作遂巡。漢書作遁巡。皆無作四字連文者。蓋遁即巡字。而遁之所以為巡者。因遁與循同也。後人傳寫。既誤改遁為巡。又移遁配逃。增于遂巡之下。遂致文義重複。其實遂遁為遂巡之異文。謂九國遲疑不進爾。若云遁逃而走。即應大被追躡。豈得但言不敢進乎。匡謬正俗及金石文字記辨之詳矣。隸釋謂四字當讀如本字。以鄭固碑遂遁退讓為用史記。則非也。碑文政可證史記非四字連文矣。漢書不當傳贊。遂遁有恥。游俠蕭章傳。遂循甚懼。

吞二周。

宋吳枋宜齋野乘曰。秦昭王五十一年。滅西周。其後七年。莊襄王滅東周。則吞二周乃始皇之曾祖與父。非始皇也。

執捶拊。

附案各處皆作敲朴。臣瓚以爲短曰敲。長曰朴。魏鄧展謂敲短杖也。朴捶也。則此似非。集解引徐廣。索隱引賈論以捶作槁。尤非。蓋擣之譌。

銷鋒鑿鑿以爲金人十二。

附案各處皆作銷鋒錕。鑄以爲金人十二。此作鑿鑿。字句雖異。而于事爲備。

躡足行伍之間。而倔起什伯之中。

附案世家作俛仰阡陌之中。漢書新書文選並作俛起阡陌。此什字乃仟之譌。阡仟陌伯佰古通。酷吏傳。伯格長。漢食貨志。開仟佰。田連仟伯。仟伯之間成羣。匡衡傳。南以閩佰爲界。郡圖誤以閩佰爲平陵。佰皆可證。已以義言之。指錢布行伍。自當從人。以田道論。則宜從阜。漢志仟伯之得。謂錢布軍法。千人爲仟。百人爲伯。謂行伍。而此應作田道解。謂涉起于田間也。注家多以行伍釋之。與上行伍句複矣。而轉攻秦。

附案此與世家並譌以轉在而下。

千乘之權。

附案各處作致萬乘之權。是也。此作千乘。非。又缺致字。

秦并海內。

案新書秦下有滅周祀句似不可刪。

以養四海。

案新書云以四海養是也。此誤倒養字。

而以威德與天下。

附案新書此威字乃盛之譌。

壞宗廟與民更始作阿房宮。

附案徐廣謂一無壞宗廟與民五字。甚是。二世無壞宗廟之事。更始作阿房宮爲句。謂復作阿房宮也。

襄公立。

附案此篇是秦記。魏了翁古今考謂班固明帝時所得也。史公言秦燒書。獨秦記不滅。故東漢時猶有存者。後人遂并班固語附載本紀之末。以備參證。史詮及丹鉛錄並云。古本自襄公立以下低兩字。別于正文。今本平頭刻。殊失其舊矣。而索隱以爲馬遷重列。則誤也。史以傳信。無一事兩書之理。史記中惟此及酈生傳有之。皆後人附益。非遷史元文。然酈道元尙錯認此記爲遷史。何論小司馬哉。此記簡古有法。先秦文字不可多見。非它附益者比。故取而校之。

死葬衙。

案秦本紀作葬西山。正義引括地志及世紀秦陵山爲據。則此言憲公葬衙似非也。

葬宣陽聚東南。

案紀作葬平陽。豈平陽有宣陽聚乎。

初志閏月。

日知錄二十六曰：宣公以前皆無閏，每三十年多一年，與諸國之史皆不合矣，則秦之所用何正邪。

繆公學著人。

案索隱云：著即宁也。考呂氏春秋尊師篇：穆公學于百里奚，公孫枝豈其先嘗學于宁門之人乎。楊慎

曰：三代之君必學于耆德，以為師保，而穆公乃學于宁人，以刑餘為周召，以法律為詩書，又不待始皇

胡亥已然矣。則景監得以薦商鞅，趙高得以殺扶蘇，終于亡秦，寺人之禍也。史書之醜之也。孫侍御云：著人未必是

寺人存疑。

共公享國五年。

案共公無五年，在位四年也。說在秦紀。

桓公享國二十七年。

案七字當作八，說在紀。

生畢公。

案證法無畢，當依春秋作哀公。秦紀不誤，此與十二侯表稱襄公，吳越春秋闔閭內傳作栢公，同誤。索

隱于秦紀引此作瑋。尤妄。

惠公享國十年。

案。惠公在位九年。說在紀。

葬車里康景。

評林曰。康景二字疑衍。或下有闕文。

葬僖公西。

案。此記兩稱僖公。而秦之諸君無諡僖者。索隱于上景公注云。一作僖公。當是景公之誤。

生刺龔公。

案。秦紀及六國表作厲共公。獨此作刺龔公。正義又謂刺一作利。蓋龔與恭通。卽共也。諡法有刺。與厲

字義同音近。而利字復因形聲相鄰致譌。猶陳厲公之爲利公爾。

葬入里。

徐廣曰。一作人。疑是也。

葬櫟圍氏。

案。以下文陵圍、囂圍、弟圍例之。則此氏字疑衍。

生靈公。

案此與表並言懷公生靈公。必是生昭子之誤。秦本紀明言靈公懷公孫。表亦言懷公太子之子爲靈公。即此紀下文固云靈公昭子子也。

肅靈公。

案紀表皆作靈公。小司馬言紀年世本無肅字。則此爲誤增。當衍之。

生簡公。

案簡公者靈公之季父。懷公之子。厲共公之孫。此以簡公爲靈公所生。大誤。亦猶十二侯表以簡公爲惠公子。索隱以簡公爲厲共公子也。

其七年。百姓初帶劍。

案紀表並在簡公六年。

葬永陵。

案惠文、悼武皆葬于畢。此乃陵名。猶前言惠文葬公陵也。

孝公立十六年。時桃李冬華。

案紀于獻公十六年。書桃李冬花。疑一事誤書。

惠文王生十九年而立。

案惠文、悼武、昭襄三君俱立于十九年。亦奇。

立四年初爲田開阡陌。

案此乃孝公十二年事。而以爲昭襄四年誤矣。

二世生十二年而立。

案紀云二十一立。此云十二。蓋譌倒耳。紀言二十一者。以踰年改元言之。此言二十者。以始皇崩年言之。

右秦襄公至二世六百一十歲。

案表自襄公元年至二世三年。實五百七十一歲。此誤。案隱秦紀末正義所說年數亦誤也。此紀是秦史

官所錄。史公采以作史記者。何以誤端疊見。蓋篆隸遞變。簡素屢更。並屬傳寫乖譌。非秦記之舊矣。

孝明皇帝十七年。

附案。孝明以下。乃班固因有召問遷書及作典引一節。遂別著此篇。并所得秦記錄之。當時必另傳于世。後人取入史記。附載于茲。故謂此篇他人作者妄。謂與典引同作者亦妄。何以言之。典引序稱永平。而此云孝明皇帝。是追述前事。非永平時所撰。甚審。典引序但稱十七年。而此云十七年十月十五日乙丑。若非孟堅自爲。何能悉其日月。典引稱臣。而此云吾讀秦紀。則非對君之言可知。

民國十一年一月一日

史記志疑卷六

項羽本紀第七

下相人也。

案郡以統縣。縣以統鄉。鄉以統里。論史法但當書郡縣。有德位殊絕者則著其鄉里。乃史公所書參錯無準。是亦體例之不合也。班彪嘗譏遷述並時之人。或縣而不郡。豈特不郡哉。

字羽

案古人之字。大約一字居多。其加子者。男子之美稱也。然高祖功臣表敘射陽侯之功云。破子羽。序傳云。子羽接之。子羽暴虐。破子羽于陔下。齊連子羽城陽。則此似宜曰字子羽。

會稽守通謂梁曰。

案漢書籍傳作項梁語。非通謂梁也。敘事迥異。未知孰實。

廣陵人召平于是爲陳王徇廣陵。

案廣陵。楚漢之間爲東陽郡。而斯時陳嬰已下東陽。疑召平以凌人爲陳王徇凌。非廣陵也。觀漢書陳勝傳。凌人秦嘉事。自見凌縣屬泗水。陳涉世家作陵人秦嘉。古字通用。下文集解引世家作廣陵人。乃誤增一廣字。荀紀作陵人召平。亦一證。

使使與連和。

附案。與上脫欲字。他本及漢書有。

蒲將軍。

附案。服虔謂英布起蒲。因以爲號。師古索隱非之是也。吳斗南以爲棘蒲侯柴武。亦非。此猶高紀之剛武侯。史失其姓名。不知何人也。

逆無道。

附案。逆上脫大字。他本及漢書有。

項梁前使項羽別攻襄城。

案。前此皆稱項籍。此後忽改稱字而不名。何也。高紀則皆稱字。

居鄴人范增。

案。索隱引荀悅漢紀云。阜陵人。阜陵屬九江。居鄴乃廬江。未知孰是。然今本漢紀作居巢。豈傳寫改之乎。

別攻城陽。

附案。成陽縣屬濟陰。非城陽國之城陽也。史。漢成陽之與城陽。往往互書。蓋古字通借。不定是誤。然因此亦頗淆混矣。

沛公項羽相與謀曰。今項梁軍破。

案。評林董份云。項羽不宜自稱季父之名。沛公于羽前亦必不名其季父。項梁字誤也。史詮云。當作武信君。余謂高紀。項羽曰。懷王者吾家項梁所立。與此同誤。

陳餘爲將。張耳爲相。

案。陳餘是時將兵在鉅鹿北。未入鉅鹿城。此陳餘爲將四字。因下文有之而重出者。當衍去。項羽爲魯公。

案。懷王封羽爲長安侯。號爲魯公。上文敍諸將之遷爵。獨遺子羽。故此言爲魯公。亦無來歷。諸別將皆屬宋義。

附案。漢紀云。宋義故楚令尹。大事記曰。懷置義爲元帥者。非特喜其知兵。亦以楚之耆舊大臣。故尊任親倚之。史。漢不載義爲楚令尹。荀氏所據。必楚漢春秋也。

士卒食芋菽。

附案。徐廣云。芋。一作半。漢書是半也。臣瓚曰。食蔬菜以菽雜半之。索隱引王劭曰。半量器名。容半升。亦通。劉孝標廣絕交論。莫肯費其半菽。東坡詩。願君五袴手。招此半菽魂。則芋字雖若可通。而實非已。

楚王陰令羽誅之。

附案。古人亦自稱字。漢書匡衡傳注引衡與貢禹書。言匡鼎白。後書周黃徐姜申屠傳序述閱貢語云。

閔仲叔豈以口腹累安邑邪。漢書羽作籍。

諸侯皆屬焉。

案諸侯下疑缺將字。漢書作兵皆屬焉。

珍寶盡有之。

附案。范增曰。沛公入關。財物無所取。沛公謂項伯曰。吾入關。秋毫不敢有所近。籍吏民。封府庫。而待將軍。樊噲謂項羽曰。沛公入咸陽。毫毛不敢有所近。封閉宮室。還軍霸上。又高紀謂沛公封秦重寶財物。府庫是高祖之不取秦寶物。皆張良、樊噲一諫之力。而曹無傷珍寶盡有之語。徒以媚羽求封耳。但蕭相國世家云。沛公至咸陽。諸將皆爭走金帛財物之府分之。然則曹無傷之言。未盡虛妄。謝項羽之玉璧與亞夫之玉斗。高祖何從得之。可知非毫無所取也。

張良曰。誰爲大王爲此計者。

案。高帝此時尙未爲王。且前後俱稱沛公。何忽于係良三稱大王邪。留侯世家作沛公。是足以當項王乎。

案。羽時亦未王。故沛公稱羽將軍。以其爲諸侯上將軍也。史乃預書爲王。此下項伯曰項王。范增、項莊曰君王。張良、樊噲曰項王。大王。沛公曰項王。凡書王者三十八。似失史體。留侯世家、樊噲傳及漢書俱不言王。甚是。惟樊噲語未盡改耳。

具以沛公言報項王。

案。項伯之招子房。非奉羽之命也。何以言報。且私良會沛。伯負漏師之重罪。尙敢告羽乎。使羽詰曰。公安與沛公語。則伯將奚對。史果可盡信哉。

則與一生彘肩。

案。生字疑誤。彘肩不可生食。且此物非進自庖人。卽撤自席上。何以生邪。孫侍御云。蓋故以此試之也。項王使都尉陳平召沛公。

附案。徐廣謂一本無都字。是也。考世家。陳平以擊降殷王拜都尉。在漢定三秦之後。而定三秦在漢元年八月。鴻門之會在十二月。則平此時不但未爲都尉。并未賜爵爲卿。乃爲尉也。

項王軍在鴻門下。沛公軍在霸上。相去四十里。沛公則置車騎。脫身獨騎。與樊噲、夏侯嬰、靳彊、紀信等四人。持劍盾步走。從酈山下道芷陽間行。沛公謂張良曰。從此道至吾軍。不過二十里耳。度我至軍中。公乃入。

案。鴻門者鴻門亭也。霸上者霸水上也。漢書高紀孟康注。謂鴻門在新豐東十七里。水經注十九卷。謂自新豐至霸城五十里。自霸城西至霸水十里。然則霸上與鴻門相隔七十七里矣。沛公罷飲脫歸。行七十七里。而項伯之夜來夜去。且馳一百五十四里。何以言四十里邪。水經注又謂鴻門在新豐城東三里。無十七里。是亦六十三里。不得稱四十里。而芷陽卽霸城。又奚云二十里乎。郭緣生述征記。謂鴻

門在霸城南門數十里。稍爲近之。而酈道元譏其學而不思。則不足信也。又董份曰。當時鴻門之宴。必有禁衛之士。訶訊出入。沛公恐不能輒自逃酒。且疾走二十里。亦已移時。沛公、良、噲三人俱出良久。羽在內何爲竟不一問。而在外竟無一人爲羽之耳目者。矧范增欲擊沛公。惟恐失之。豈容在外良久而不亟召之邪。此皆可疑。徐氏測議曰。漢祖脫身至軍。潯陽疑之固當。然觀史記敘漢人飲。中坐多有更衣。或如廁竟去。而主人不知者。意當時之飲。與今少異。又間有良駿行四十里。而酒杯猶溫者。漢祖之能疾行。得此力也。其所云步走。或史遷誤。董、徐二君之辨。俱不必疑。余所疑者。鴻門、霸上之里數不合耳。里數定。則時之久暫可知矣。當日沛公借如廁得出。與良、噲數語。卽去。爲時元不甚久。而古人飲酒。與今殊禮。寧以出外爲嫌。車騎猶在。更復何猜。況羽已使陳平召之。何嘗竟置不問。若論禁衛訶訊。則彼尙不能禦樊噲之入。烏能止沛公之出乎。度至軍乃入。亦約略之詞。想張良必祇度其追不可及而卽入焉。壯士步走數十里。固事之常。不得以史公爲誤也。紀信、漢書作紀成。乃紀通之父。未知孰是。索隱謂漢書作紀通。妄已。孫侍御云。里數當以史爲信。

項羽引兵西屠咸陽。

案前已屢書項王。此後又搃三語曰。項羽引兵西屠咸陽。曰。項羽方渡河救趙。曰。引其兵降項羽。何也。先下河南郡。

案漢書籍傳無郡字。是此衍。河南郡高帝二年始置。

徙趙王歇爲代王。

案代王都代遼東王都無終膠東王都卽墨此紀于諸國俱言所都而三國獨否蓋缺也。
王九郡。

附案項羽王梁楚九郡。史漢皆不詳。注家亦略。史詮謂泗水碭薛東海臨淮彭城廣陵會稽鄆九郡。然臨淮郡漢武帝元狩六年置彭城郡宣帝地節元年置廣陵國非郡。武帝元狩五年更江都國爲廣陵中間爲郡止三年鄆郡之置未知何時。秦無鄆郡豈羽置之乎。經史問答言秦于楚地置十郡項王以漢中封高祖九江封英布南郡封共敖長沙爲義帝都而自得東海泗水薛會稽南陽黔中秦于梁地置三郡項王以河東封魏豹而自得碭東郡凡得郡八。據史記益以楚郡適得九郡之目然秦無楚郡恐是誤會楚世家之文南陽黔中隔數國豈能遙屬于楚。程全兩說俱難信。惟錢宮詹大昕漢書考異謂史稱九郡者據當時分置郡名數之引高紀六年封荆楚二王地作證以泗水東海碭薛鄆吳會稽東郡爲九甚確。

乃陰令衡山臨江王擊殺之江中。

案黥布傳言九江王使將追殺義帝于郴與漢書合而此與高紀謂是衡山臨江殺之師古漢書高紀注曰衡山臨江與布同受羽命而殺之者布也江中當依高紀作江南指郴縣言若江中則殺于道路矣。又考義帝之殺此與高紀在漢元年四月而月表在二年十月黥布傳在元年八月漢書從月表然

究未知的在何月。義帝以元年四月自臨淮盱台縣徙桂陽之郴。使人趣其行。不及一月可到。英布等追而殺之。則甫及郴卽被弑矣。疑四月爲是。

田榮聞項羽徙齊王市膠東。

案此後宜稱項王矣。而忽呼項羽者四。曰田榮聞項羽徙齊王市膠東。曰項羽聞漢王皆已并關中。曰以齊梁反書遺項羽。曰項羽遂北至城陽。又呼其名曰獨籍所殺漢軍數百人。俱當改項王。

而西擊殺濟北王田安。

案紀表傳皆言田榮殺田安。惟漢書高紀籍傳云彭越殺之。與年表儻傳異。豈是時越受榮將軍印而爲之驅除邪。然越傳何以不書。

陳餘陰使張同夏說說齊王田榮。

案高紀及陳餘傳皆無張恐非二人僭說也。

逐其故主趙王。

案趙王歇乃陳餘之故主也。其字當衍。

齊趙叛之。

案齊叛指田榮擊殺田都。田市。田安。并王三齊也。趙叛指陳餘破常山王。迎還趙歇也。然趙叛事在二年。此時尚未當依漢書作齊梁叛之爲是。下文張良以齊梁反書遺項王可證。指彭越反梁地也。

漢之二年冬。項羽遂北至城陽。

案冬當作春。事在春也。

春漢王部五諸侯兵。

案春當作夏。下文四月二字亦當移。此事在夏四月也。又史不數五諸侯爲誰。注者復多異說。應劭曰。

雍、翟、塞、殷、韓、如淳曰塞、翟、魏、殷、河南。徐廣·司馬貞同。韋昭曰塞、翟、殷、韓、魏。師古曰常山、河南、韓、魏、殷。顧增·張

劉放刊誤曰河南、韓、魏、殷、趙。吳仁傑補遺曰塞、翟、魏、韓、趙。全氏經史問答曰魏、韓、趙、齊、殷。余考雍方被

圍。自不與其列。塞、翟、殷、河南俱已亡國。常山間關入漢。安得有兵。各家所數祇韓、魏、趙、齊爲可信。蓋魏

趙從軍。皆見于其傳。韓王之從軍。見于月表。合齊擊楚。見于淮陰傳。是得四諸侯兵。而其一必衡山也。

衡山王吳芮之將梅鋗。自高祖入武關時。卽以兵從。故令甲稱芮至忠。封長沙王。則彭城之役。有不屬

在行間者乎。漢書考異引董教增曰。注家牽引諸王。以足五數。項籍傳贊云。將五諸侯滅秦。又繫何人。

當據故七國。以地言。不以王言。漢定三秦。卽故秦地。項羽王楚。卽故楚地。其餘三晉、齊、燕爲五。此說恐

非。羽所將之五諸侯。是趙、齊、燕、魏、韓五王。

是時呂后兄周呂侯。

案水經注二十三云。楚、漢、彭城之戰。呂后弟周軍于下邑。而史、漢俱作呂后兄。未知孰是。但道元誤以

澤名周。安知不又誤以兄爲弟邪。呂澤是時未封。依史法不當預稱周呂侯。

楚下滎陽城。生得周苛。

附案。高紀及漢書此事。在羽東擊彭越之後。當三年六月。今并書于五月守滎陽下者。蓋終言之。于文法爲連敍。亦猶上文敍陳餘破張耳迎趙歇一節。是二年事。而因陳餘說田榮。遂并敍于元年也。說

高紀

漢之四年。

附案。此以下所敍之事。前後倒置。不但與漢書異。并與高紀不同。恐係錯簡。細校如左。漢之四年。當在後擊陳留外黃句上。觀漢書高紀。籍傳自明。

是時彭越渡河擊楚東阿。殺楚將軍薛公。項王乃自東擊彭越。案。高紀及漢書紀傳。項王擊彭越。是三年五月。在楚拔滎陽及成皋之前。此書于拔成皋後。一誤也。越渡睢水。與項聲。薛公戰下邳。殺薛公。此不書項聲。而又謂渡河擊東阿。二誤也。

漢王得淮陰侯兵。

案。淮陰侯當依高紀作韓信。下文五稱淮陰侯同。

使劉賈將兵佐彭越燒楚積聚。

案。漢王使盧縮。劉賈將兵佐越擊破楚軍燕郭西。燒其積聚。攻下睢陽。外黃十七城。此但言賈佐越燒積聚。似太略。當參高紀。越傳及漢書觀之。此下應接項王乃謂海春侯一段。

項王東擊破之走彭越。

案此卽下文項王令曹咎守城皋而引兵定梁地之事。彭越傳所謂越北走穀城者也。在此紀中于事爲重出于文無所附當衍之。

漢王則引兵渡河復取成皋軍廣武就敖倉食。

附案此乃敗海春侯後事當在下文項王信任之句下。

項王已定東海來西與漢俱臨廣武而軍。

案此以下至是時彭越復反下梁地絕楚糧一段當在後漢軍畏楚盡走險阻句下而衍去已定東海來五字蓋定東海卽下定梁地十餘城事于文爲錯出也。

相守數月。

案漢書高紀籍傳皆無數月二字是也。此時爲漢四年十月纔軍廣武不得便言數月當是一月。于是項王乃卽漢王相與臨廣武間而語。

附案義門讀書記云間藝文類聚引作澗然以孟注兩城相對觀之則如字也。余考水經注七曰西廣武漢所城也。高祖與項羽臨絕澗對語責羽十罪羽射漢祖中胸處東廣武項羽城之夾城之間有絕澗斷山謂之廣武澗項羽叱婁煩于其上矣。故藝文類聚九引作澗則今本史漢俱譌。義門見史漢並作間字遂以孟康注實之而不知孟注乃指廣武城言也。又范曄傳言秦昭王四十三年城河上廣武。

則廣武城恐不盡是楚、漢所築。
破齊、趙。

案、韓信破趙已踰年矣。非破齊一時事。此與高紀皆多一趙字。漢書無。

乃使龍且往擊之。

案、楚救齊之役。此及淮陰、田儻傳止言龍且爲將。而高紀兼言周蘭、灌嬰傳兼言留公。蓋紀傳互見也。但漢書籍傳謂羽使從兄子項它爲大將。龍且爲裨將。救齊。舍主將而書偏裨。何也。

淮陰侯與戰騎將灌嬰擊之。

案、此與高紀皆多一戰字。當衍之。漢書無戰騎將三字。

韓信因自立爲齊王。

附案、信以四年十月破齊。十一月殺齊王廣。因以書乞自立爲假王。漢因事而封之。在二月。高紀、月表、田儻、淮陰傳皆云然。其實信自立爲齊王。在十一月。與漢王書言假王。隱真情耳。續古今考謂信自立爲王。在十一月。其使人以書與漢王言假王者。乃擅自立爲王之後始請之。

大司馬咎、長史翳、塞王欣皆自剄汜水上。

附案、高紀及漢書紀傳皆無翳塞王三字。此後人妄增之。何者。翳降漢後。雖與欣同叛歸楚。而不復再見。蓋欣與項王有舊恩。故得棄瑕而仍任用之。非翳可比矣。惟欣曾封塞王。後文稱故塞王。甚合。乃此

及高紀並以長史稱之。漢書亦然。或疑此當衍長史翳三字。曰否。後文又有長史欣也。盧學士云。翳塞王三字。必非史記本文。觀下但舉咎。欣兩人可知。翳舊爲都尉。不爲長史。又欣旣稱塞王。則翳亦當稱翟王。此數者皆不協。故知非也。

是時漢兵盛食多。

附案。此紀譌舛之處。已說見上。今依文摘敘。當云。項王進兵圍成皋。

至

令其不得西。

此下刪是時彭越渡河二十四字。漢

王得淮陰侯兵。欲渡河南。鄭忠說漢王。乃止。壁河內。使劉賈將兵佐彭越燒楚積聚。

此下刪項王九字。

項王乃謂

海春侯大司馬曹咎等。

至

乃東行。漢之四年。擊陳留。外黃。

至

是以項王信任之。漢王則引兵渡河。復取

成皋。軍廣武。就敖倉食。當是時。項王在睢陽。

至

盡走險阻。項王

此下刪已定東海來五字。

西與漢俱臨廣武而軍。

至

絕楚糧。是時漢兵盛食多。項王兵罷食絕。

卽歸漢王父母妻子。

案。月表及王陵傳稱太公呂后較之。此與高紀作父母妻子爲安。且是時孝惠未爲楚虜。而如淳晉灼

漢書注引漢儀注。言高帝母兵起時死。陳留小黃。則此時亦不得有母媼也。文選陸士衡高祖功臣頌。

侯公伏軾。皇媼來歸。亦非。

漢王乃封侯公爲平國君。

附案。金石錄載金鄉守長侯君碑云。侯公諡安國君。趙曰。高祖紀。侯公封平國君。此碑言安國。旣不同。

而平國君乃生時稱號。如婁敬爲奉春君之類。碑以爲諡。恐非。余疑諡當作號。解說在孟嘗君傳。建成侯彭越。

附案。越爲魏相國。未聞封侯。蓋所賜名號。曹參亦有建成侯之稱。本傳不載。

韓信乃從齊往。劉賈軍從壽春。並行屠城父。至垓下。大司馬周殷叛楚。以舒屠六。舉九江兵隨劉賈。彭越。皆會垓下。

案。此段頗有缺誤。當云。韓信乃從齊往。彭越乃從魏往。劉賈軍從壽春。迎黥布。並行屠城父。大司馬周殷叛楚。以舒屠六。舉九江兵隨劉賈。黥布。皆會垓下。

有美人名虞。

附案。徐廣云。一作姓虞氏。是。漢書全襲史記。政作姓虞氏也。

是時赤泉侯爲騎將。

案。楊喜封赤泉侯。在七年。漢書改稱楊喜。是也。此兩稱赤泉。皆當作楊喜。又索隱謂漢書表及後漢作熹。音火志反。而今本俱作喜。惟隸釋楊震碑作楊熹。蓋古字通用。猶以熹爲喜也。

獨籍所殺漢軍數百人。項王身亦被十餘創。

案。此二語。上稱籍。下稱項王。竟似兩人矣。未免語病。

分其地爲五。

附案。評林謂宋本分字上有故字。史詮以爲今本缺。然宋倪思班馬異同無故字。倪所見必宋本也。分其地。通鑑作分其尸。非分其地爲五。當屬下文。謂分地以封呂馬童等五人爲侯耳。其地不必定泥作楚地。

葬項王穀城。

附案。水經注八云。穀城縣故春秋之小穀城。有項羽冢。今彭城穀陽城西南又有羽冢。非也。日知錄三十一云。注引皇覽以爲東郡之穀城。與留侯所葆黃石同其地。不然矣。宋孫復春秋尊王發微曰。曲阜西北有小穀城。蓋魯邑。而宋李石續博物志疑穀城二冢是身首異處。亦非無見。

玄武侯。

明陳子龍史記測議曰。侯表中不見。豈始封而卽廢歟。

吾聞之周生曰。舜目蓋重瞳子。又聞項羽亦重瞳子。羽豈其苗裔邪。

案。示兒編謂舜重瞳子。因舜典明四目而誤。或當然也。古來重瞳甚多。不盡作天子。劉晝新論命相曰。顏回重瞳。它若漢書王莽。晉書涼州呂光。梁書沈約。隋書魚俱羅。五代史記後梁朱友孜。及南唐李煜。俱是重瞳。舜踐帝位。豈僅因異相。而項氏又豈舜後邪。項乃以國爲氏者。春秋魯僖公滅項。其後楚取以封其臣。遂稱項氏。其初姓不著。豈楚之支屬歟。于舜何預焉。論衡骨相。奇怪兩篇言項羽自謂虞舜之後。皆附會此說以誣羽耳。

高祖本紀第八

字季。

案季乃是行。高祖長兄伯次兄仲亦行也。史以季爲字。與索隱以季爲名並非。若季是字。則張釋之何以字季乎。高祖名邦。與兄名喜弟名交同。索隱引項岱謂卽位易名。非論史例。帝名于本紀之首宜一見。藝文類聚十二引史曰。高祖諱邦。字季。恐不可信。蓋所引多刪改也。

父曰太公。母曰劉媪。

案馬班以漢人紀漢事。寧有不知高祖父母姓名之理。乃太公不書名。母媪不書姓。豈諱而不書。如諸帝之不書名邪。然諱名不諱姓。母媪無姓又何說。皇甫謐謂太上皇名執嘉。媪王氏。名含始。王符謂名嫫。並見史注。後書章帝紀注云。名媪。一名執嘉。唐書世系表云。豐公名仁。太公名媪。字執嘉。索隱又引班固泗水亭長碑云。母溫氏。諸說不同。顏師古斥皇甫謐等爲妄。嗣後古今考。容齋三筆。嫫真子俱從師古以爲不可信。而宋王楙野客叢書。宋費袞梁溪漫志及周嬰卮林。又力辨師古之非。以皇甫等所載可補史闕。真疑莫能明也。

其先劉媪嘗息大澤之陂。夢與神遇。是時雷電晦冥。太公往視。則見蛟龍于其上。

案媪所夢者神也。太公所見者蛟龍也。論衡吉驗。奇怪篇兩引此紀。皆作蛟龍。漢書作交龍。非。然其事甚妄。說在殷紀。

單父人呂公。

案索隱引漢舊儀云汝南新蔡人引相經云魏人未知孰是又云呂公名文字叔平也後封臨泗侯追

諡宣王。

卒與劉季。

案史稱劉季凡十一此稱在當時人則可遷數呼之可乎且忽曰高祖忽曰劉季于例亦雜也此等處

漢書爲密。

生孝惠。

附案史詮謂宋本惠下有帝字班馬異同本亦有則今本脫也下文見孝惠句亦脫帝字漢書皆作孝

惠帝。

皆似君。

附案漢書作皆以君如淳曰以或作似師古曰不當作似則史記誤也宋書符瑞志亦作以字論衡骨

相篇誤仍作似字古以字作目與似通故誤作似左傳襄三十一年令尹似君亦以字之譌。

不敢忘德。

澹南集辨惑曰此但其術可貴耳何德之有。

到豐西澤中止飲。

案漢書作澤中亭師古曰其亭在澤中因以爲名則此似脫亭字若但言澤中豈能止飲乎前有蛇當徑

案賈子春秋篇新序雜事二謂晉文公之興也蛇當道夢天殺蛇曰何故當聖君道而蛇死漢高之興也亦蛇當徑斬蛇而姬夜哭宋書武帝之興也大蛇見洲裏射之而青衣擣藥何前後事之同乎朱子語錄以高祖赤帝子之事爲虛續古今考言斬蛇事是僞爲神奇史公好奇載之凌稚隆漢書評林引明敖英曰適然遭蛇而斬之無足怪者若神母夜哭神其事以鼓西行之氣耳田單守墨而天神下降陳勝首禍而魚腹獻書類可槩見

芒陽靈氣亦此類

平生所聞劉季諸珍怪

濔南集辨惑曰珍字不安漢書改爲奇是矣

攻胡陵方與還守豐

案月表在二世二年十月漢紀同此誤在元年

陳涉之將周章軍西至戲而還

案章爲章邯所敗自剄而死非還也

燕趙齊魏皆自立爲王項氏起吳

案趙爲王在元年八月燕齊魏在九月與沛項並起此并絃于二年非也又考陳涉世家及魏豹傳魏

咎之立出于周市。非若燕趙諸人之自立也。故咎爲王凡十月。而三月不居其位。周市虛位待之。月表書曰。咎在陳不得歸國。又書曰。咎自陳歸立。所以成周市之志爾。夫豈自立哉。

泗川。

附案。秦有泗水郡。蓋川乃水字之譌。古水作也。周勃世家及漢書高紀。續郡國志並譌作泗川。

周市來攻方與。未戰。陳王使魏人周市略地。

附案。評林余有丁云。此一周市也。書法如此。疑誤。史詮謂是兩周市。故下加魏人以別之。漢書作魏人周市。略地豐沛。無周市來攻方與未戰。陳王使十一字。或以爲當衍。皆非也。趙太常云。未戰二字。乃不了語。沛公因聞豐反。遂引兵去方與。而往攻豐也。陳王使魏人周市略地九字。當移在周市來攻方與之上。則文順而明矣。

是時秦將章邯從陳。別將司馬卬將兵北定楚地。

附案。從陳謂追討。卬乃巨之譌。師古曰。古夷字。胡三省引類篇云。古仁字。漢書樊噲傳可證。史漢他處皆譌作卬。而曹參傳又作欣。則孟堅誤矣。司馬其姓。巨其名。秦之別將。與下文趙別將司馬卬同一句法。劉攽云。別將當連下句讀。言章邯身從陳。而令別將定楚耳。劉說本索隱。

沛公還引兵攻豐。

案。月表云。拔之雍齒。奔魏。與漢書高紀同。此文不備。

居數月。

案月表及漢紀立懷王在六月。攻亢父在七月。中間只隔數十日。安得謂居數月乎。疑月當作日。秦二世三年。

案此當在後文沛公引兵西遇彭越昌邑句上。誤書于此。

僂悍猾賊。

附案。猾字不似羽之爲人。蓋禍字之譌。漢書作禍賊。師古曰。好爲禍害而殘賊也。

今項羽僂悍。今不可遣。

案徐廣謂一本無下今字。余謂上句云。今誠得長者往。似不便連用三今字。僂悍亦複。依漢書作項羽不可遣爲是。

乃道碭至成陽。與杠里秦軍夾壁。破魏二軍。

案史詮云。各本與杠里屬上句。誤也。時秦軍屯杠里。漢軍亦屯杠里。與之對壘。故曰夾壁。破魏之魏當作秦。漢書魏作其是也。史詮之說甚協。漢書誤成陽爲陽城。則不可從。蓋譌倒耳。城陽在濟陰。陽城在潁川。史漢成城二字通用。

楚軍出兵擊王離。大破之。

案此乃項羽救趙之兵也。方敘沛公入關事。不應忽插入楚軍。況下文總敘項羽救趙。破秦將王離。降

章邯則此爲重出明矣。漢書無此十字。當衍。宋劉辰翁評班馬異同云。雜楚軍于破二軍下。則疑于楚。漢與彭越俱攻秦。

沛公引兵西遇彭越昌邑。因與俱攻秦軍。戰不利。還至栗。遇剛武侯。奪其軍。可四千餘人。并之。與魏將皇欣、魏申徒、武蒲之軍并攻昌邑。昌邑未拔。

案月表。秦三年十二月。沛公至栗。得皇欣、武蒲軍。與秦戰。破之。二月。得彭越軍昌邑。又漢紀。十二月。沛公引兵至栗。遇剛武侯。奪其軍。與魏將皇欣、武滿合攻秦軍。破之。二月。從碭北攻昌邑。遇彭越。越助攻昌邑。未下。然則先遇剛武侯。後遇彭越也。先至栗。後至昌邑也。先合兵破秦軍。後攻昌邑。未拔也。乃此謂遇彭越在遇剛武之前。誤一。斯時無與秦戰不利之事。誤二。遇彭越昌邑。因與攻秦。不利。還栗。似未曾奪剛武合魏將而已攻昌邑。至後攻而未拔。爲復攻昌邑。誤三。以與彭越爲攻秦。以奪剛武合魏將爲攻昌邑。誤四。準義驗文。當云。秦二世三年。說見上。沛公引兵至栗。遇剛武侯。奪其軍。可四千餘人。并之。與魏將皇欣、魏申徒、武蒲之軍俱攻秦軍。戰破之。遂西。不利二字必破之二字之譌。漢書是破之。還字亦必遂字之譌。遇彭越昌邑。因與并攻昌邑。昌邑未拔。至若剛武侯不知爲誰。史失其名。姓武蒲。當依漢書高紀。作武滿。此與月表皆作蒲。非也。二字每以形近互譌。說在十二侯表。晉厲公元年。

于是沛公乃夜引兵從他道還。更旗幟。黎明。圍宛城三市。

附案。漢書作偃旗幟。劉辰翁從更字解。以爲欲令見者驚。非昨比。余謂偃旗幟。是引兵還時事。索隱引

楚漢春秋曰。上南攻宛。匿旌旗。人銜枚。馬束舌。兵法所云出其不意也。更旗幟則圍宛三市。事兩者皆通。

高武侯鯁。

附案。晉灼謂卽功臣表臨轅侯戚鯁。是也。高武蓋初賜名號侯。師古以爲別一人。恐非。

襄侯王陵。

附案。韋昭謂漢封王陵爲安國侯。初起兵時在南陽。南陽有穰縣。襄當爲穰。無禾字。省。此說是也。臣瓚謂韓成封穰侯。江夏有襄。是陵所封。師古又謂王陵非安國侯。皆不然。下文云。因王陵兵南陽以迎太公。呂后于沛。功臣表云。以廢將別定東郡。南陽。漢表云。以自聚黨定南陽。陵本傳云。自聚黨數千人居南陽。又張蒼傳云。蒼以客從攻南陽。坐法當斬。王陵見而怪其美士。乃言沛公赦勿斬。合而證之。則此王陵卽安國侯明矣。穰侯者。或沛公初封之。或陵聚黨時自稱之。均未可知。蓋陵封安國在後。而前此凡爲二侯。五年臣瓚注引漢帝年紀云。信平侯臣陵。信平當是名號侯。故杜恬位次曰信平侯也。與穰侯爲二。豈信平又別人乎。若項羽封韓城爲穰侯。在漢元年四月以後。陵實先之。江夏則更不相接。全氏經史問答亦云。

遇番君別將梅鋗。與皆陵析酈。

附案。史詮曰。湖本偕作皆誤。

乃用張良計。使酈生。陸賈往說秦將。啗以利。因襲攻武關。破之。又與秦軍戰于藍田南。益張疑兵旗幟。

案月表留侯世家及漢書紀傳沛公以秦二世三年八月攻破武關九月秦遣將距峽關

調在藍田南武關之西

張良說沛公張旗幟爲疑兵使酈生啗秦將以利秦雲懈因引兵繞峽關踰黃山擊破之藍田南

踰黃山者繞出峽關之西又引長安志曰藍田關卽峽關

張良計益張疑兵旗幟使酈生往說秦將啗以利因襲攻峽關破之又與秦軍戰于藍田南而陸賈二

字似衍文留侯世家陸賈傳及漢書張陸兩傳荀悅漢紀皆無之疑此與漢書高紀並妄攙陸賈耳

與父老約法三章耳

案漢書刑法志曰漢興約法三章網漏吞舟之魚然其大辟尙有夷三族之令又考惠帝四年始除挾

書律呂后元年始除三族罪妖言令文帝元年始除收孥諸相坐律令二年始除誹謗律十三年除肉

刑然則秦法未嘗悉除三章徒爲虛語續古今考所謂一時姑爲大言以慰民也蓋三章不足禁姦蕭

何爲相采摭秦法作律九章疑此等皆在九章之內史公只載入關初約耳

十一月中項羽果率諸侯兵西欲入關關門閉聞沛公已定關中大怒使黥布等攻破函谷關十二月中

遂至戲

案十一月當移在上文召諸縣父老豪傑句上衍去中字而十二月中四字當在項羽果率諸侯兵西

句上蓋約法三章在十一月羽破函谷在十二月月表及漢紀可證也

聞項王怒

案高祖紀書項羽尊君之體宜然。況此時羽尙未王。尤不宜預呼之。下文云項王使卒三萬人從項王北擊齊。項王不聽。項王歸漢王父母妻子。紀中前後皆稱項羽。何忽呼王者。五皆當作項羽。因以文諭項羽。

案羽紀及漢書乃項伯言之于羽。非以文諭也。此誤。

吾家項梁所立耳。

案項梁當作武信君。說在羽紀。

乃佯尊懷王爲義帝。實不用其命。正月。

案正月當在乃佯尊懷王上。命字下當書二月。漢紀表與月表可證。

廣不聽。滅荼攻殺之無終。

案燕王滅荼攻殺遼東王韓廣在八月。此并書于二月分封時。非也。

諸侯各就國。

案十八王已見項羽紀。此處可省。乃祇敘十三王。而無魏豹、田安、田市、田都、韓成。又諸國皆言所都之地。而代王獨缺。其故何邪。

韓信說漢王。

附案說漢王之韓信。據韓信傳以爲韓王信。據漢書高紀以爲淮陰侯。蓋緣名姓無殊。遂彼此雙載。師

古兩疑之曰。豈史家謬錯乎。將二人所勸。大指實同也。因生斯疑。後竟有以韓王信爲誤。而實指淮陰侯者。不知徐廣明云。韓王信。非淮陰侯信。師古豈未檢徐廣史記本邪。漢書評林明王慎中曰。是時淮陰尙未知名。班掾認爲淮陰信。故特爲補出拜將一節。而以此說爲問計之詞。及其傳韓王信。仍以此說入之。何自相矛盾。合從史記元注。

殺田都。

案田都走楚。非被田榮殺之也。此誤。

陳餘怨項羽之弗王己也。令夏說說田榮。請兵擊張耳。齊予陳餘兵。擊破常山王張耳。張耳亡歸漢。迎趙王歇于代。復立爲趙王。趙王因立陳餘爲代王。

附案。破常山迎趙歇等事。在二年十月。而此與羽紀皆書于元年者。蓋餘之說榮。在元年榮并三齊之時。觀陳餘田儋傳自明。史遂順撫以終其事。不復另敘。非他處誤亂比也。故二年但書曰。張耳來見漢王。厚遇之。

八月。漢王用韓信之計。故從道還襲雍王章邯。邯迎擊漢陳倉。雍兵敗。還走。止戰好時。又復敗走廢丘。漢王遂定雍地。東至咸陽。引兵圍雍王廢丘。而遣諸將略定隴西北地。上郡。

附案。漢王定三秦。當依此紀。在八月爲是。月表。淮陰傳皆云。八月。將相名臣表亦云。秋也。漢書襲雍圍廢丘。于紀在五月。于表在七月。自相牴牾。而均非事實。蓋四月罷兵就國。未必踰月卽出兵襲雍。漢書

蕭何傳言何諫漢王願王漢中養其民以致賢人收用巴蜀還定三秦漢王善之則是時漢方暫務休息寧有坐不暖席使爾東伐乎況自戲下罷兵至南鄭自南鄭至雍往返遼遠非旬日可徧者哉當是七月起兵至八月而襲雍也

二年漢王東略地塞王欣翟王翳河南王申陽皆降韓王昌不聽使韓信擊破之于是置隴西北地上郡渭南河上中地郡關外置河南郡

案塞翟之降在元年八月蓋惕于雍王之敗望風而降也此書于二年之首殊非事實至隴西北地上郡渭南河上皆元年八月置是時因重正五郡之疆界復總言之故將相表云二年春定塞翟魏河南韓殷國非至是塞翟始降而置郡也且上年紀中有略定上郡語上郡是翟國若二年始降何以元年八月有略定上郡之文乎塞與翟偕降可互證也惟中地屬雍章邯殺後始置事在六月此言與隴西等郡同置誤矣又月表及漢紀以拔隴西在二年十一月拔北地在正月漢異姓表以拔隴西在十月拔北地在十二月並謬元年八月已定雍地故有略定隴西北地語時章邯止守廢丘耳漢王之出關至陝撫關外父老還張耳來見漢王厚遇之

案至陝在十月還在十一月張耳來亦在十月此紀皆書于正月非

更立漢社稷

劉辰翁曰漢書此處有復關中除租稅置三老舉行能賜酒肉等政是兵間規模宏大收拾人心處子

長失之。

新城三老董公遮說漢王以義帝死故。

案董公乃鄉三老也。新城是鄉名，其名舊矣。至惠帝四年，遂置爲縣。此時新城尙未爲縣也。但考漢百官表，言鄉有三老，不言縣亦有三老。而漢書高紀二年有擇鄉三老一人爲縣三老之令。大事記據之直書置縣鄉三老，不知表中何以不載，可疑也。隸釋亦有縣三老楊信碑。又溇南集辨惑曰：董公遮說漢王殊切于義理，故孟堅全載其說，而遷但云說以義帝死故，太簡而不備，且止于義帝死故，則謂之告可也，何必云說哉。

悉發關內兵，收三河士，南浮江，漢以下。

經史問答曰：史記注皆不得其說。師古略之，梅磻以爲一軍由三河以攻其北，一軍浮江，漢以攻其南，是矣。然本紀不載南下之軍，則竟失之也。水經注：高祖二年置長沙郡，又置黔中郡，蓋南下之軍自漢中出，先定二郡而有之。長沙乃義帝之都，而黔中則項王南境，乘虛取之，所謂南浮江，漢也。是足以補

梅磻乃胡三遺書身之也。

乃取漢王父母妻子于沛。

案下又云項王歸漢王父母妻子，說在羽紀。

塞王欣亡入楚。

案漢紀云塞王欣、翟王翳降楚，殷王卬死，此缺不具。更名廢丘爲槐里。

附案秦之廢丘，周之犬丘也。更名槐里，漢志云在三年，非也。當依史二年爲是。但竹書周懿王十五年，王自宗周遷于槐里，則槐里之名久矣。豈高祖復其舊歟？抑竹書不足憑也。

是時九江王布與龍且戰不勝，與隨何間行歸漢。

案布之歸漢，在三年十二月，獨此書于二年六月已後，誤。

破楚京索間。

案破楚事，漢紀書于二年五月，在六月立太子前，與羽紀合，此誤在後。

三年，魏王豹謁歸視親疾，至卽絕河津，反爲楚。漢王使酈生說豹，豹不聽。漢王遣將軍韓信擊大破之。虜豹，遂定魏地，置三郡曰河東、太原、上黨。

案豹之反在漢二年五月，淮陰傳作二年六月，已誤。此紀及曹相國世家作三年，尤誤。漢使酈生說豹，與遣韓信擊豹，皆在二年八月。虜豹在二年九月，此紀并書于三年，亦誤。又太原郡屬趙地，漢滅趙王歇始置，乃連入魏地，更爲誤矣。月表言河東、上黨是，淮陰傳又失言上黨也。漢紀亦誤，仍史連言太原、予陳平金四萬斤。

附案史、漢皆言四萬斤，而唐李嗣真諫武后用來，俊臣疏作五萬斤。

漢與楚相距滎陽數歲。

案漢以二年五月屯滎陽。三年五月出滎陽。月表作七月連閏計之。首尾纔十四月。何言數歲乎。當作歲

餘為是。上文固有相距歲餘之語也。

漢堅壁不與戰。

附案漢下當有王字。史詮曰湖本缺也。

饗軍小脩武南。

附案饗字一本作鄉。是也。漢書作鄉。師古云鄉讀曰嚮。

與彭越復擊破楚軍燕郭西。

案此以下敘事倒亂。幾不可讀。當云與彭越復擊破楚軍燕郭西。此處似缺燒楚積聚四字遂復下梁地十餘城。項

羽乃謂海春侯大司馬曹咎曰。謹守成皋。若漢挑戰。慎勿與戰。無令得東而已。我十五日必定梁地。復

從將軍乃行。淮陰已受命東。淮陰字誤。當作韓信。未渡平原。漢王使酈生往說齊王田廣。廣叛楚與漢和。共擊項

羽。

四年韓信用蒯通計。遂襲破齊。齊王烹酈生。東走高密。項羽擊陳留。外黃。睢陽下之。聞韓信已舉河北

兵破齊。趙。趙字衍。說見羽紀。且欲擊楚。而使龍且。周蘭往擊之。不書主將項它。說在羽紀。漢果數挑楚軍。軍字下倪本史。漢俱有戰字。楚

軍不出。使人辱之。五六日。大司馬怒。渡兵汜水。士卒半渡。漢擊之。大破楚軍。盡得楚國金玉貨賂。大司

馬咎長史欣皆自到汜水上。不日故塞王而曰長史與羽紀同。項羽在睢陽。在字依羽紀此譌為至字。聞海春侯破乃引兵還漢軍

方圍鍾離昧于滎陽東項羽至盡走險阻楚漢久相持未決丁壯苦軍旅老弱罷轉饑漢王項羽相與

臨廣武之間而語。間當作澗說在羽紀。項羽欲與漢王獨身挑戰漢王數項羽曰始與項羽俱受命懷王曰先

入定關中者王之。至病甚因馳入成泉韓信與戰。騎將灌嬰擊大破楚軍。漢書無病愈上從漢書西入

王廣犇彭越。犇彭越上缺田橫二字。當此時彭越將兵居梁地往來苦楚兵絕其糧食漢王病愈。補漢王二字西入

關。至關中兵益出韓信已破齊使人言曰齊邊楚。立韓信為齊王項羽聞龍且軍破則恐使盱台人

武涉往說韓信韓信不聽當此時彭越將兵居梁地往來苦楚兵絕其糧食。劉辰翁曰越苦楚兵此漢事將成也子長重出此語。

未必無意辰翁說是漢書謂彭越田橫苦楚似孟堅談。田橫往從之項羽數擊彭越等。

至陽夏南止軍

案自此至大會垓下皆五年冬事誤在四年也。

漢王敗固陵乃使使者召大司馬殷舉九江兵而迎之武王行屠城父隨何劉賈齊梁諸侯皆大會垓下

案此事各處所書不同當云漢王三字。衍取固陵乃使使者召大司馬周殷舉九江兵而迎。衍之武王行屠城

父隨。衍何劉賈齊梁諸侯皆大會垓下隨何不過謁者僅說九江王一見此時諸侯大會無緣置身其

間也史漢各處元無何字

立武王布為淮南王

案布王在四年七月。此誤書于四年之末。應在歸太公呂后前。徐氏測議曰。黥布稱武王。本傳不載。當是叛楚以後未歸漢以前假爲此號。猶項羽自稱霸王邪。楚熊達及趙佗並稱武王。

高祖與諸侯兵共擊楚軍。與項羽決勝垓下。淮陰侯將三十萬自當之。孔將軍居左。費將軍居右。皇帝在後。絳侯、柴將軍在皇帝後。

案續古今考云。太史公豈信筆乎。韓信是時爲齊王。書曰淮陰侯。漢王未爲皇帝。書曰皇帝。追書人臣則從輕。人主則從重乎。董份云。至下方尊皇帝。則不宜卽著此二字。余謂高祖二字亦錯出。皆當作漢王。淮陰侯當作齊王信。又是時周勃爲將軍。其封絳侯在六年。何以不與柴武稱將軍。而書曰絳侯邪。孔將軍、費將軍卽功臣表。蓼侯、費侯也。陳賀封費亦在六年。乃不曰陳將軍。而曰費將軍。非但與孔將軍之稱姓異。抑且古無以國冠官而稱之者。至西京雜記謂孔、費二將軍皆假爲名。恐不可信。

項羽卒聞漢軍之楚歌。

案之字當衍。

諸侯及將相與共請尊漢王爲皇帝。

漢書評林曰。高祖初上尊號。以開四百年丕基。自宜鄭重其事。以故班書載諸侯王兩疏及高祖兩讓之詞。蓋帝王之規模如是哉。史記失之略矣。

甲午。乃卽皇帝位。汜水之陽。

案漢書是二月甲午。此缺二月兩字。

皇帝曰。義帝無後。齊王韓信習楚風俗。徙爲楚王。都下邳。立建成侯彭越爲梁王。都定陶。故韓王信爲韓王。都陽翟。徙衡山王吳芮爲長沙王。都臨湘。

案秦改命爲制。令爲詔。漢遂因之。故漢書于高祖未卽帝位稱令。已卽帝位稱詔。是時封韓。彭在正月。漢書稱令。以未卽帝位也。封吳芮在二月。漢書稱詔。以已卽帝位也。乃此以封韓。彭在卽位後。而又并詔令兩詞爲一端。毋乃乖乎。至韓信久封韓王。不煩重敍。蓋十字是衍文。漢書無之。但當于後文淮南王布之上補韓王信三字耳。抑更有疑者。本紀以制詔爲重。自宜詳載。今觀漢諸紀。高祖文帝之詔。不載頗多。景帝則不載一詔。而其所載詔書。復不若班史概以詔稱之。或稱高祖曰。或稱皇帝曰。或稱帝曰。或稱上曰。體例亦太錯雜矣。王應麟漢書藝文志考證云。文帝紀。凡詔皆稱上曰。以其出于帝之實意也。此論殊非。紀中赦天下。賜酺。赦濟北吏民。及除肉刑。議郊祀。何以稱詔不稱上。豈不出于實意邪。而詔詞每與漢書不同。甚且撮舉數言而不全錄。增損字句而非元文。去取之情。固不可曉。擅改之咎。尙復何辭。史通點繁篇謂撰史不妨減略。詔書以武后時史官寫制誥一字不遺爲訾。斯偏說也。且亦因後世詔語尤長。故爲此論。漢詔簡古。奚須裁削哉。至漢書載封吳芮之詔。謂以長沙。豫章。象郡。桂林。南海封之。尤疑而莫解。蓋是時豫章屬淮南王英布。象郡。桂林。南海屬南粵趙佗。則芮獨有長沙爾。詔何以言五郡。又高祖後以南海封南武侯織爲王。不知當日分封之制若何。文穎皆謂虛奪以封之。恐

未然。

故臨江王驩爲項羽叛漢。令盧綰、劉賈圍之不下。數月而降。殺之雒陽。

案臨江之殺在十二月。漢書與月表甚明。此誤書于二月。卽帝位後。又臨江王之名。徐廣一作尉。是荆燕世家。盧綰傳及漢書紀表傳並作尉。惟月表誤爲驩。此必後人因表妄改也。

諸侯子在關中者。復之十二歲。其歸者。復之六歲。食之一歲。

案漢書詳述此詔。無食之一歲語。而詔語數百字。史公止摘復諸侯子四句。何也。

夫運籌策帷帳之中。

附案。漢書無策字。御覽八十七引史作于字。疑策字譌。然留侯世家論及作籌策也。

十月。燕王臧荼反。

案。十月乃七月之誤。說在月表。

使丞相噲將兵攻代。

司馬光通鑑攷異曰。樊噲傳。從平韓王信。乃遷左丞相。是時未爲丞相。又代地無反者。噲傳亦無此事。

疑紀誤。漢書作平代地。

今高祖雖子。人主也。

案。高祖當依漢書作皇帝。

于是高祖乃尊太公爲太上皇。

案漢紀高祖于六年三月自洛陽歸櫟陽朝太公五月尊爲太上皇此書于六年十二月前誤矣但考

漢紀五年正月追尊兄伯爲武哀侯二月追尊先媼爲昭靈夫人尊王后曰皇后太子曰皇太子

史不太略后稱皇后則母當稱皇太后乃止稱夫人何也亦僅免于呼媼而已不應太公獨未有號皇后之父尙封臨泗侯況天子之父乎乃遲至

六年始因家令言尊之真所難曉豈六年以前太公爲庶人乎而太上皇之號定于漢歷唐宋以來皆

仍以稱帝父其實此號乃秦始皇追尊其父莊襄王者與其效嬴秦曷不用趙武靈王稱主父故事邪

雖然爲天子父則尊之至不係乎尊號之有無也人主之名不可以壓父而父無尊號豈遂爲人臣自

戰國有臣父之說而此義不明于天下家令之言卽齊東野人之語苟悅嘗譏其爲過索隱表出之是

已而晉中庶子劉寶對愍懷太子以苟悅論家令爲不然謂家令說是異哉所聞東漢質帝卽位時其

父渤海王鴻見存未知當日典禮若何降及後代如魏常道公奐景元元年十一月其父燕王宇表賀

冬稱臣東魏孝靜帝以父亶爲大司馬五代周世宗臣其父柴守禮宋度宗在位福王與芮是所生父

帝羸立則爲大父乃退就羣臣之列以親王出爲節度使皆咄咄怪事又唐世有父母拜王妃舅姑拜

公主之令尤爲悖矣

十二月人有上變事告楚王信謀反

附案漢紀告反在六年十月此在十二月者因會陳執信在十二月遂并敘之其實是十月也

田肯賀。

附案。顏氏家訓書證篇曰。漢書田肯賀上。江南本皆作宵字。沛國劉顯博覽經籍。偏精班漢。梁代謂之漢聖。顯子臻不墜家業。讀班史呼爲田肯。梁元帝嘗問之。答曰。此無義可求。但臣家舊本以雌黃改宵字爲肯。元帝無以難之。吾至江北。見本爲肯。

因說高祖曰。

附案。倪本曰。下有甚善二字。以漢書及荀紀校之。今本缺也。

故此東西秦也。

附案。劉攽云。西字衍。非也。此總承上文。劉必因荀紀刪去西字而爲此說。

乃論功與諸侯剖符行封。

案。功臣表及漢書封諸侯在十二月。此敍于正月封荆楚諸王之後。非。

七年匈奴攻韓王信馬邑。信因與同謀反太原。

案。韓王之反。此在七年。表在五年。並誤也。當依信本傳作六年爲是。漢紀表亦云六年九月。

立故趙將趙利爲王以反。

案。信本傳云。立趙苗裔。漢紀云。趙後。則將乃後字之誤。其後爲陳豨將守東垣也。

立兄劉仲爲代王。

案劉喜之王在六年正月與封荆楚齊三王同時此誤書于七年二月前也吳凜傳同誤二月高祖自平城過趙雒陽至長安

案漢紀高祖十二月過趙二月至長安非二月自平城抵長安也劉辰翁以雒陽二字多蕭丞相營作未央宮

案漢紀此事在七年二月史作八年非

代王劉仲棄國亡自歸雒陽廢以爲合陽侯

案代王棄國歸漢此紀及功臣表將相表在八年九月諸侯王表在九年皆誤當依漢紀表作七年十二月爲是而合陽應作郃陽省作合字此紀及功臣表與漢書高紀王子表吳凜傳並作合陽將相表吳凜傳漢書惠紀並作郃陽水經注四亦作郃陽所謂劉仲城也地理志郃陽屬左馮翊合陽屬平原郡

趙相貫高等事發覺夷三族

案貫高等三族雖論死然其白王不反之後高祖方赦其罪則所謂夷三族者疑其論其罪如此而未嘗實夷其族也不然當是獨赦貫高一家耳

未央宮成

案未央宮與長樂宮皆以七年二月成漢紀及三輔黃圖可證是年特以諸侯王來朝十月置酒未央

宮也。此與將相表同誤在九年。

八月趙相國陳豨反代地。

案豨反在十年九月。此與功臣表作八月。酈商傳作七月。傅寬傳作四月。並誤。本傳及漢書可證。至淮陰侯及盧縮傳以爲十一年反。尤誤也。豨本傳又誤作七年。惟言反在九月是。

立子恆以爲代王。

案代王之立。在十一年正月。表作三月。是誤在後。而此書于冬。又誤在前也。恆字何以不避古禮。卒哭乃諱。春秋以來。雖生時亦諱之。秦漢諱甚嚴。乃史于紀表犯文帝諱不一而足。景帝紀亦犯孝武諱。皆史公失檢處。文帝紀載有司請立太子云。子某最長。當用此例。書曰立子某以爲代王。卽金滕所謂玄孫某也。高祖謂太上皇曰。今某之業所就。孰與仲多。亦與此同。

都晉陽。

附案文帝紀諸侯王表。陳豨傳俱作都中都。與此言都晉陽不同。文紀又言幸太原。復晉陽。中都三歲。租疑當時詔都晉陽。而實居中都。亦猶韓王信詔都晉陽。而請居馬邑耳。故如淳注以爲遷于中都也。夏。梁王彭越謀反。廢遷蜀。復欲反。遂夷三族。立子恢爲梁王。子友爲淮陽王。案廢越立恢。皆在三月。漢紀可據。此與黥布。盧縮傳並作夏夷彭越。誤也。史漢諸侯王表書恢。友以十一年三月立。若越之謀反夷族在夏。安得三月已封恢。友爲王乎。至史諸侯王表及漢異姓表以越誅

在十年則更誤矣。

漢將別擊布軍洮水南北皆大破之。追得斬布鄱陽。

附案。經史問答曰。蘇林如淳皆不能言洮水所在。徐廣曰。在江淮間。而不能實指其水。胡梅磻曰。零陵之洮水也。布欲由長沙入粵。故走洮水。梅磻之言誤。九江左右本無洮水。而布死于番陽。布之封兼有壽春。江夏。豫章。而都壽春。豫章在壽春之南。番陽又豫章之南。長沙又番陽之南。零陵又長沙之南。非可猝來猝返。長沙與布婚。雖欲依之。然長沙當嫌疑之際。使布竟得長驅直入其國。與漢兵鬪于洮水。則長沙直與之同反矣。既不與同反。便當逆拒之。布安得走洮水乎。且布既至洮水而敗矣。何以不竟走粵。乃返轡而東。又出長沙之境。重入于淮南國中之番陽。而長沙始遣人誘殺之。不殺之于其國。縱賊之出而徐殺之。何其愚也。夫布與長沙婚。則必約長沙同反。長沙不答。所以能世其國。而容布入其國。橫行乎。且布欲入粵。不必走長沙。布國中之豫章與粵接。可以入粵之徑甚多。欲走長沙者。特望其同反也。長沙不答。所以逆之于境。而誘殺之。番陽是布尙未出其國也。然則洮水者何水乎。曰。是蓋九江之洮水乎。洮與洮相似而譌。布敗于斬。反走其國。又敗于洮。乃思投長沙。未至而死于番陽。如是則其地得矣。洮水見水經。顧宛溪欲以震澤之洮湖當之。則在吳王濞國內矣。益謬。

樊噲別將兵定代。斬陳豨當城。

案。豨傳亦言樊噲斬之。而噲傳不及。則非噲明甚。蓋周勃斬之也。絳侯世家及漢書可證。又世家功臣

表及豨傳皆云斬豨靈丘。此言當城亦小異。俱代郡縣名。水經注十三言周勃定代，斬陳豨于當城也。楚隱王陳涉。

案陳涉二字當衍。漢書詔詞無之。蓋諸帝王皆不稱名也。索隱以隱王爲楚幽王，大謬。予守冢各十家。

附案此言趙悼襄王亦予守冢十家，而漢書云五家。史漢載詔詞不同，疑漢書誤。

二月使樊噲、周勃將兵擊燕王綰，赦燕吏民與反者，立皇子建爲燕王。

附案擊綰王建同在十二年二月中。諸侯王表書燕王建以三月甲午封，誤。此與漢書高紀諸侯王表

作二月可據。今本漢書高紀兩書三月。譌刻耳。惟異姓表在十一年，則誤甚。蓋是年二月辛巳朔有甲午，三月庚戌朔

無甲午也。

四月甲辰高祖崩長樂宮。

附案御覽八十七引史云：四月甲辰崩于長樂宮。時年六十二，在位十二年，葬長陵。今史記無之，但臣

瓚謂帝年四十二卽位，壽五十三。皇甫謐謂高祖以秦昭王五十一年生，至漢十二年，年六十三。蓋瓚

說非也。謐言六十三亦六十一之謬。

陳平灌嬰將十萬守滎陽，樊噲、周勃將二十萬定燕代。此聞帝崩，諸將皆誅，必連兵還鄉以攻關中。

通鑑考異曰：呂后雖暴亦安敢一旦盡誅大臣。又時陳平不在滎陽，樊噲不在代，此說恐妄。

丙寅葬己巳立太子至太上皇廟。

案丙寅上缺五月二字。丙寅下衍葬字。而以論末葬長陵三字移此。蓋錯簡也。又考二年六月立孝惠爲太子。何待是時始立。正義以立太子爲帝解之。則與下文太子襲號爲皇帝複矣。漢書作五月丙寅葬長陵。已下也。已下棺皇太子羣臣皆反至太上皇廟。疑已乃己字之重。立乃下字之誤。而正義又云。有本脫己字者。妄引漢書已下者。非則又不然矣。劉辰翁曰。只似多一立字。己巳太子至太上皇廟。甚順。史證亦曰。立字衍文。太子屬下句讀。王孝廉曰。立太子當是皇太子之譌。

羣臣皆曰高祖起微細。

案此時羣臣方議尊號。何得先稱高祖。漢書作帝是也。

次代王恆。

案恆字當避。史證曰當省。

葬長陵。

附案。此是錯簡。當在丙寅句下。